

摘藻堂四庫全書薈要

史部

欽定四庫全書薈要

史部
通志卷四十五

詳校官員外郎臣楊世綸



欽定四庫全書薈要卷八千九百四十三

史部

通志卷四十四

宋 右迪功郎鄭樵漁仲撰

禮略第三

嘉禮

天子加元服

皇太子冠

皇子皇孫附

諸侯大夫士冠

天子納妃后

冊后附

天子冊妃嬪夫人

皇太子

納妃

皇子諸王婚公主嫁附

公侯大夫士婚禮

元正冬至

受朝賀 讀時令 冊拜諸王侯 三老五更

鄉飲酒

賓禮

三恪二王後

軍禮

天子諸侯將出征類宜造禡并祭所過山川 輶
祭 田獵 講武 命將出征 宣露布 大射
鄉射 合朔伐鼓 祭馬祖 時儺

嘉禮

天子加元服

周制文王年十二而冠

文王十三生伯邑考左傳曰冠而生子禮也

成王十

五而冠

譙周五經然否論云古文尚書武王崩成王年十三推武王庚辰歲崩周公以壬午歲出居東

癸未歲反禮公冠記周公冠成王命史作祝辭告是除喪冠也周公未反成王冠弁開金縢之書時十六矣是成王十五周公冠之而後出也按禮傳天子之年近則十二遠則十五必冠矣

將冠筮曰筮賓

行之於廟冠委貌於阼三加彌尊

冠義曰冠於阼以著代也或曰三加彌尊

士禮也大戴禮公冠篇曰公冠四加後加元冕天子亦四加後加衮冕

裸享樂于廟

左傳曰晉

侯問魯大夫季武子襄公年曰君可冠矣武子對曰君冠必以裸享之禮行之以金石之樂節之以先君之祧

處之周公冠成王命史雍頌曰近於民遠於年遠於佞近

於義嗇於時惠於財祿賢使能漢改皇帝冠為加元服
惠帝加元服用正月甲子若丙子為吉後漢遵前制皆
以正月甲子若丙子為吉日可加元服儀從冠禮乘輿
初加緇布進賢次爵弁次武弁次通天冠冠訖皆於高
祖廟如禮謁見和帝冠以正月甲子乘金根車駕六元
虬至廟成禮乃迴軫反宮朝服以饗宴撞太簇之鐘咸

獻壽焉順帝以初月丙子加元服於高廟獻帝興平元年正月甲子加元服司徒淳于嘉為賓加賜元纁駟馬賜貴人王公卿司隸校尉城門五校及侍中尚書給事黃門侍郎各一人為太子舍人魏氏天子冠一加其說曰古之士禮服必三加彌尊所以喻其志至於天子諸侯無加數之尤者將以踐阼臨人尊極德成不復與士以加喻勉為義禮冠於廟自魏不復在廟矣東晉諸帝冠儀一加幘冕將冠金石宿設百僚陪位又先於殿上鋪大牀御府令奉冕幘簪導袞服以授侍中常侍太尉加幘太保加冕太尉讀

祝文曰令月吉日始加元服皇帝穆穆思弘袞職欽若
昊天六合是式率遵祖考永永無極眉壽惟祺介茲景
福加冕訖侍中繫元統脫帝絳紗服加袞服冠事畢太
祝率羣臣奉觴上壽王公以下三稱萬歲乃退成帝用
三元吉日既加元服拜于太廟穆帝孝武將冠皆先以
幣告廟訖事又廟見臺符問脩服未畢吉凶不相干為
可加元服與不太常王彪之議禮雖有喪冠當是應冠
之年服制未終若須服終便失應冠之年故也今便准

喪冠闕饗樂而行事不須脩服畢按晉故事及兩漢亦
不必三元當任時事之宜耳後魏正光元年秋孝明帝
年十一加元服訖拜太廟大赦改元北齊制皇帝加元
服以玉帛告園丘方澤以幣告廟擇日臨軒皇帝著空
頂介幘以出太尉盥訖升脫空頂幘以黑介幘奉加訖
太尉進太保之右北面讀祝訖太保加冕侍中繫元統
脫絳紗袍加袞服事畢太保上壽羣官三稱萬歲皇帝
入溫室移御座而不上壽後日文武羣官朝服上禮酒

十二鍾米十二囊牛十二頭又擇日親拜園丘方澤謁廟唐制具開元儀

皇太子冠

皇子皇孫附

周制天子元子猶士也天下無生而貴者也

家語冠頌曰天子之

元子之冠擬諸侯之冠四加

漢宣帝冠太子以正月冠諸王遣使行

事魏氏冠太子再加皇子王公嗣子乃三

孫毓以為一加再加皆非

禮也冠諸王因漢遣使行事晉惠帝之為太子將冠武帝

臨軒使兼司徒高陽王珪加冠兼光祿大夫屯騎校尉

華廙贊冠泰始六年南宮王承年十五依舊應冠有司
奏議禮十五成童國君十五而生子以明可冠之義又
漢魏遣使冠諸王非古典於是制儀王十五而冠遂革
使命咸寧二年閏九月遣使冠汝南王東惠帝以正月
丙午冠太子訖乃廟見懷帝亦以正月冠皇太子宋冠
皇太子及藩王以一加齊武帝孫南郡王昭業冠從尚
書令王儉議使太常持節一加冠大鴻臚為贊醺酒之
儀國官陪位拜賀如常其日內外二品清官以上詣公

車門集賀并詣東宮南門通牋別日上禮官臣亦詣門
稱慶如上臺之儀既冠之後剋日謁廟祝辭曰皇帝使
給事中太常武安侯蕭惠本加南郡王冠筮日戒賓肇
加元服棄爾幼志從厥成德親賢使能克崇景福醺酒
辭曰旨酒既清嘉薦既盈兄弟具在淑慎儀刑永永眉
壽於穆斯寧明帝冠太子用正月梁武帝天監十三年
正月冠太子於太極殿脩前代之儀後魏孝文帝冠皇
太子恂於廟詔曰司馬彪漢志漢帝有四加冠一緇布

二進賢三武弁四通天朕見家語冠頌篇四加冠公也
家語夫子之言與正經何異諸儒惑司馬彪志致使天
子之子而行士冠朕以為有賓諸儒皆以為無賓孔氏
所云斐然成章其斯之謂矣北齊制皇太子冠則太尉
以制幣告七廟擇日臨軒有司供帳於崇正殿中嚴皇
太子空頂幘公服出立東階之南西面使者入立西階
之南東面太子受詔訖入室盥櫛出南面使者進揖詣
冠席西面坐光祿卿盥訖詣太子前跪櫛使者又盥奉

進賢三梁冠至太子前東面祝脫空頂幘加冠太子興入室更衣出又南就冠席光祿卿盥櫛使者又盥祝脫三梁冠再加遠遊冠太子入室更衣設席中楹之西使者揖就席南面光祿卿洗爵酌醴使者詣席前北面祝太子拜受醴即席坐祭之啐之奠爵降階復位西面三師三少及在位羣官拜事訖又擇日會宮臣又擇日謁廟隋制皇太子將冠前一日帝齋於大興殿太子與賓贊及預從官齋於正寢其日質明有司告廟各設筵於

阼帝衮冕即御座賓揖太子進升筵西向坐贊冠者坐

櫛設纓賓盥訖初加緇布冠贊進設頤

立癸切

纓賓揖太

子適東序衣元衣素裳以出贊者又坐櫛賓進加遠遊

冠改服訖賓又授冕太子適東序改服以出賓揖太子

南面立賓受醴進筵前北面立祝

之又切

太子拜受鬴賓

復位東面答拜贊者奉饌於筵前太子祭奠禮畢降筵

進當御東面拜納言承詔詣太子戒訖太子拜贊者引

太子降自西階賓少進字之贊者引太子進立於庭東

面諸親拜訖贊者拜太子皆答拜與賓贊俱復位納言承詔降命令有司致禮賓贊又拜帝復降阼階下拜太子以下皆拜帝出更衣還宮太子從至閣因入見皇后而還唐貞觀五年正月有司上言皇太子將冠禮宜用二月為吉請追兵以備儀注太宗曰今東作方興恐妨農事令改用十月太子少保蕭瑀奏稱准陰陽家用二月為勝上曰陰陽拘忌朕所不行若動靜必依陰陽不顧禮義欲求福祐其可得乎若所行皆遵正道自然當

與吉會且吉凶在人豈假陰陽拘忌農時甚要不可暫失開元六年侍中宋璟上表曰臣伏以太常狀准東宮典記有上禮之儀謹按上禮非古從南齊後魏方始有此事而垂拱神龍更扇其道羣臣斂錢獻食君上厚賜答之姑息施恩方便求利皇太子冠乃盛禮自然合有賜賚上臺東宮兩處宴會非不優厚其上禮宜停其儀具開元禮

諸侯大夫士冠

夏小正記二月冠子之時也周制繼世以立諸侯象賢也冠禮筮日筮賓冠於阼醺於客位三加彌尊已冠而字之見於母母拜之見於兄弟兄弟拜之成人而與為禮晉王

堪冠禮儀云永平元年

惠帝時

正月戊子冠中外四孫立

于步廣里舍之阼階設一席于東廂引冠者以長幼次于席南東上賓宗人立于西廂東面南上堪立于東軒西南面西上陳元服于席上宗人執儀以次呼冠者各應曰諾宗人申誡之曰以歲之正以月之令兄弟具來

咸加爾服棄爾幼志順爾成德克慎威儀惟民之則壽
考惟祺永受景福冠者高跪而冠各自著布興再拜從
立于賓南上酌四杯酒各拜醺而飲事訖上堂向御史
府君再拜訖冠者皆東面坐如常燕禮時賓宗人東平
王隆叔祚王循道安王業建始此皆古禮也但以意斟
酌從其簡者耳唐制具開元禮

天子納妃后

冊后附

伏羲氏制嫁娶以儷皮為禮夏氏親迎於庭殷迎於堂

周制限男女之歲定婚姻之時

媒氏云令男三十而娶女二十而嫁婚姻之時

即仲春

親迎於戶六禮之儀始備

一曰納采二曰問名三曰納吉四曰納徵

五曰請期六曰親迎惟納徵用束帛他皆用鴈

天子聘女納徵加穀珪漢惠帝

納后納采鴈璧乘馬束帛聘黃金二萬斤馬十二匹

呂氏

為惠帝娶魯元公主女故特優其禮

平帝立王莽納女為后以固權及莽

所聘杜陵氏女皆侈大其事不足為法後漢桓帝立明年有司奏太后曰春秋迎皇后于紀在塗則稱后今大將軍冀女弟應紹聖善結婚之際有命既集宜備禮幣

於是悉依孝惠皇帝納后故事聘黃金二百斤納采鴈
璧乘馬束帛一如舊典靈帝冊宋貴人為皇后天子御
章德殿軒百官陪位太尉襲便持節奉璽紱皇后北面
帝南面太尉立階下東向宗正大長秋西向宗正讀冊
畢皇后拜稱臣妾就位太尉授璽紱中常侍長秋太僕
高卿侯覽長跪受璽紱奏於殿前女史以次受之至于
昭儀受而長跪以帶皇后皇后伏起拜稱臣妾畢黃門
鼓吹三通鳴鼓畢羣臣以次出后即位大赦天下魏制

天子冊后以皮馬庭實加穀珪齊王正始四年立后甄氏其儀不存晉武帝咸寧二年臨軒遣太尉賈充策立皇后楊氏因大赦賜王公已下各有差百僚上禮

納悼后

太康八年有司奏大婚納徵用元纁束帛加穀珪馬二

駟羊鴈酒米如故

尚書朱整議按魏婚故事天子以皮馬為庭實加以穀珪

東晉成

帝咸康二年臨軒遣使持節兼太保領軍諸葛恢兼太

尉護軍孔愉六禮備物拜皇后杜氏即日入宮帝御太

極殿羣臣畢賀康帝建元元年納后褚氏而儀注陞者

不設旄頭殿中御史奏今迎皇后依昔成恭皇后入宮
御物而儀注至尊袞冕升殿旄頭不設又按昔迎成恭
皇后唯作青龍旂其餘皆即御物今當臨軒遣使而五
牛旂旄旄頭畢畢並出即用舊置今闕詔曰今所以正
法服升太極者以謹其始故備禮也今云何闕所重而
撤法物邪又恭后神主入廟先帝詔后禮宜有降不宜
建五牛旗既不設五旗則旄頭畢畢之物易具也又詔
舊制既難準且於今而備法服儀飾粗舉其兼副雜器

停之穆帝永和十年臺符問六禮版文舊稱皇帝今太后臨朝當何稱博士曹耽云公羊傳婚禮不稱主人母命諸父為主太常王彪之云三傳異義不可全據今皇后臨朝稱制文告所達國之大典皆仰稟成命非無外事也豈婚聘獨不通乎六禮版文應稱皇太后詔符又問今太后還政不復臨朝當何稱彪之云當稱皇帝詔升平元年將納皇后何氏彪之正禮曰王者之於四海無不臣妾雖復父兄之親師友之賢皆純臣也夫崇三

網之始定乾坤之儀安有天父之尊而稱臣下之命以
納伉儷安有臣下之卑而稱天父之名以行大禮遠尋
古禮於義不通按咸寧二年納悼皇后時弘訓太后臨
天下而無命戚屬之臣為武皇父兄主婚之文考咸寧
故事不稱父兄師友則當時華恒所上合於舊也謂今
納后儀制一依咸寧故事從之

華恒定六禮宜依舊唯
娶婦之家三日不舉樂

而咸康羣臣賀為失禮故
但依咸寧上禮不復賀

其告廟六禮版文等皆彪之

所定

博士荀納云凡六禮版長尺二寸以應十二月博
四寸以象四時厚八分以象八節皆真書后家答

鮫脚
書之

納采問名納吉請期親迎皆用鴈白羊各一酒米

各十二斛唯納徵用白羊一元纁帛三疋絳二疋絹二
百疋獸皮二枚錢二百萬玉璧一枚酒米各十二斛馬
六匹鄭康成所謂五鴈六禮也六禮之文皆稱皇帝咨
后家稱糞土臣某頓首稽首再拜以答其策皇后之文
曰惟升平元年八月皇帝使使持節兼太保侍中太宰
武陵王晞冊命故散騎侍郎女何氏為皇后咨爾易本
乾坤詩首闕睢王化之本實由內輔是故皇英嬪虞帝

道以光妊姒母周允嗣克崇皇后其祇勗厥德以肅承
宗廟虔恭中饋盡其婦道帥導六宮作軌儀于四海皇
天無親惟德是依可不慎歟北齊皇帝納后之禮納采
問名納徵訖告園丘方澤及廟是日皇帝臨軒命太尉
為使司徒副之持節詣后行宮東向奉璽綬冊以授中
常侍皇后受冊於行殿使者與公卿以下皆拜有司備
迎禮太尉太保受詔而行主人公服迎拜於門使者入
升自賓階東面主人升自阼階西面禮物陳於庭設席

於兩楹間童子以璽書版升主人跪受送使者拜于大

門外有司先於昭陽殿兩楹間供帳為同牢之具皇后

服大嚴繡衣帶綬珮加幃

音景

女長御引出升畫輪四望

車女侍中負璽陪乘鹵簿如大駕皇帝服袞冕出升御

座皇后入門大鹵簿住門外小鹵簿入到東上閣施步

障降車席道以入昭陽殿前至席位姆去幃皇后先拜

後起皇帝後拜先起升自西階詣同牢座與皇后俱坐

各三飲訖又各酌二爵一卷奏禮畢后興南向立皇帝

御太極殿王公以下拜表謝又明日以榛栗棗脩見皇太后於昭陽殿擇日羣臣上禮又擇日謁廟皇帝使太尉先以太牢告而後遍見羣廟唐皇帝納后卜日告天地臨軒命太尉為使宗正卿為副並如開元禮

天子冊妃嬪夫人

周制天子后立六宮三夫人九嬪二十七世婦八十一御女以聽天下之內治後漢獻帝建安十八年曹操進三女憲節華為夫人聘以束帛元纁五萬疋小者待年

於國二十年並拜貴人晉武帝泰始十年將聘三夫人
九嬪有司奏禮皇后聘以穀珪無妾媵禮贄之制詔曰
拜授可依魏氏故事於是臨軒便使持節兼太常拜三
夫人兼御史中丞拜九嬪

皇太子納妃

皇子諸王婚公主嫁附

漢制皇太子納妃奉常迎

時叔孫通定禮以天子無親迎之義皇太子以奉常迎也

晉太康中有司奏太子婚納徵用元纁束帛加璧羊馬
二駟東晉太子婚納徵禮用玉璧一虎皮二漢魏之禮

公主居第尚公主者來第成婚司空王朗以為不可其
後乃革魏公主嫁用絹百九十疋晉故事用絹三百疋
太元中公主納徵以獸豹皮一宋文帝元嘉十五年四
月皇太子納妃六禮文與納后不異百官上禮其月壬
戌於太極殿西堂叙宴二宮隊主副司徒侍郎以上諸
二千石在都邑者並在會又詔令小會可停伎樂

時有
臨川

曹太
妃喪

明帝太始五年有司奏按晉江左以來太子婚納

徵用璧一獸皮二未詳合用獐豹皮及熊羆皮與不若

應用者為各用一為用兩博士裴昭明按周禮納徵元

纁束帛儷皮

鄭康成曰束帛以致命兩皮庭實皮鹿皮

晉納妃以虎皮二虎

豹雖文禮所不用熊羆吉祥婚典不及珪璋之美為用

各異今儲皇聘納宜准經誥兼太常丞孫詵議以為聘

幣之典損益惟我禮稱束帛儷皮則珪璋數同璧熊羆

文豹各應用二博士虞龢議按儀禮直云元纁束帛儷

皮禮記郊特牲云虎豹皮與玉璧非虛作也虎豹皮居

然用兩璋宜仍舊各一參議詵龢二議不異今加珪璋

各一豹熊羆皮各二以餽議為允詔可齊武帝永明中
以婚禮奢貴勅諸王納妃上御及六宮依禮上棗栗服
脩加以香澤花粉其餘衣物皆停唯公主降嫁則上遺
舅姑北齊皇太子納妃禮皇帝遣使納采其次問名納
吉並如納采禮納徵則使司徒及尚書令為使備禮物
而行請期則以太常宗正卿為使如納采親迎以太尉
為使三日妃朝皇帝於昭陽殿又朝皇后於宣光殿擇
日羣臣上禮他日妃還又他日皇太子拜閤皇太子及

王聘禮納采問名納吉請期親迎皆用羔一鴈一酒黍
稷米麴各一斛納徵用元三疋纁二疋束帛十疋大璋
一虎皮二錦綵六十疋絹二百疋羔一羊四犢二酒黍
稷米麴各十斛從車百乘隋皇太子納妃禮皇帝臨軒
使者受詔而行主人候於廟門使者執鴈主人迎拜於
大門之東使者入升自西階立於兩楹間南面納采訖
乃行問名儀事畢主人請致禮於從者禮有幣焉其次
擇日納吉又擇日以玉帛乘馬納徵又擇日告期又擇

日命有司以特牲告廟冊妃皇太子將親迎皇帝臨軒
醺而誡曰往迎爾相承我宗事勗帥以敬對曰謹奉詔
既命羽儀而行主人几筵於廟妃服褕翟立於東房主
人迎於門外西面拜皇太子答拜主人揖皇太子先入
主人升立於阼階西面皇太子升進當房戶前北面跪
奠鴈俛伏興拜降出妃父少進西面戒之母於西階上
施衿結帨及門內施鞶申之出門妃升輅乘以几姆加
幘皇太子乃馭輪三周馭者代之皇太子出大門乘輅

羽儀還宮妃三日雞鳴夙興以朝奠筭於皇帝皇帝撫之又奠筭於皇后皇后撫之席於戶牖間妃立於席西祭奠而出唐皇太子納妃禮臨軒命使行納采問名納吉納徵請期告廟臨軒醮戒親迎同牢朝見並如開元禮開元十九年四月勅於京城置禮會院屬司農寺其什物各令所司供

院在崇仁坊南街

建中元年十一月禮儀使

顏真卿等奏郡縣主見舅姑請於禮會院過事明日早舅姑坐堂行執筭之禮其觀華燭非宜並請停障車下

壻却扇等行禮之夕可以感恩至於聲樂尤須禁斷初貞觀中侍中王珪之子尚太宗女南平公主珪請于帝乞存舅姑之義於是夫妻西向坐公主親行盥饋之禮自是公主有舅姑者皆備婦禮其後此禮陵遲故真卿建明之

公侯大夫士婚禮

周制婚禮其詳見於禮經漢平帝詔光祿大夫劉歆等雜定婚禮四輔公卿大夫博士郎吏家屬皆以禮娶迎

立輶倂馬

立乘小車也倂馬儻駕也新定此制也倂音步幸切

後漢鄭衆百官六

禮辭大畧因於周制而禮物凡三十種各內有謁文外

有贊文魏制諸侯娶妃以皮馬為庭實加以大璋王娶

妃公主嫁用絹百九十疋晉太康八年有司奏王侯婚

禮元纁束帛加璧乘馬大夫用元纁束帛加羊

奏曰古者以皮

馬庭實天子加穀珪諸侯加大璋可依周禮改璧用璋其羊鴈酒米元纁如故

諸侯婚禮加納

采告期親迎各帛五疋及納徵馬四匹皆令夫家自備

唯璋官為具足

尚書朱整議按魏氏故事王娶妃公主嫁之禮天子諸侯以皮馬為庭實天子

加以穀珪諸侯加以大璋漢高后制聘后黃金二萬斤馬十二匹聘夫人金五千斤馬四匹魏志娶妃公主嫁之禮用絹一百九十疋

晉故事用絹三百疋

北齊聘禮第一品以下至三品

用元三疋纁二疋東帛十疋璧一

四品以下皆無璧

豹皮二

六品

以下至從九

品用鹿皮 錦綵四十疋二品三十疋三品二十疋

四品

雜綵十六疋五品十疋六品七品五疋

絹百四十疋二品百二十疋三品

百疋

六品以下至九品遞降二十疋

羔一羊二犢二酒黍稷稻米麴各

四斛

四品五品特一酒黍以下各一斛六品以下無犢酒黍以下各一斛

唐顯慶四年十

月詔天子嫁女受財三品以上之家不得過絹三百疋

四品五品不得過二百疋六品七品不得過一百疋八品以下不得過五十疋皆充所嫁女資裝等用其夫家不得受陪門之財

李義府奏

太極元年十一月左司郎中唐

紹上表曰士庶親迎之禮備諸六禮所以承宗廟事舅姑當須昏以為期詰朝謁見往者下俚庸鄙時有障車邀其酒食以為戲樂近日此風轉盛上及王公乃廣奏音樂多集徒侶遮擁道路留滯淹時邀致財物動踰萬計遂使障車禮貺過於聘財歌舞喧譁殊非助感既虧

名教又蠹風猷請一切禁斷從之

臣謹按後漢之俗聘禮三十物者以元纁羊鴈清酒
白酒粳米稷米蒲葦卷栢嘉禾長命縷膠漆五色絲
合歡鈴九子墨金錢祿得香草鳳凰舍利獸鴛鴦受
福獸魚鹿烏九子婦腸燧鑽凡二十八物又有丹為
五色之榮青為東方之始共三十物皆有俗儀不足
書臣又按杜佑議上古人食禽獸之肉而衣其皮毛
周氏尚文去質元衣纁裳猶用皮為鞞所以制婚禮

納徵用元纁儷皮充當時之所服耳秦漢以降衣服
制度與三代殊乃不合更以元纁及皮為禮物也又
有用虎皮豹皮者王彪之云取威猛有斑彩尤臆說
也人之常情非今是古不詳古今之異制禮數之從
宜今時俗用五色信頗得禮之變也或曰近代所以
尚循元纁儷皮之制男女配合教化大倫示存古儀
務重其禮安可捨棄有類去羊答曰元纁及皮當時
之要詳觀三代制度或沿或革皆貴適時並無虛事

豈今百王之末畢循往古之儀如三代制天子諸侯
至庶人祭則立尸秦漢廢之又天下列國唯事征伐
志存於射建侯擇士皆主於斯秦漢以降改制郡縣
戰爭既息射藝自輕唯祀與戎國之大事今並豈要
復舊制乎其朝宗覲遇行朝享禮畢諸侯皆右肉袒
於廟門之東乃入門右北面立告聽事今豈須行此
禮乎賓禮甚重兩楹間有反爵之坫築土為之今會
客豈須置坫乎又並安能復古道邪畧舉數事其可

知也易曰隨時之義其大矣哉先聖之言不可誣也

元正冬至受朝賀

漢高帝十月定秦遂為歲首七年長樂宮成叔孫通制諸侯羣臣朝賀儀先平明謁者治禮引以次入殿門庭中陳車騎設兵張旗幟功臣列侯諸將軍軍吏以下陳西方東向文官丞相以下陳東方西向於是皇帝輦出房諸侯王以下至吏六百石以次奉賀禮畢復置法酒諸侍坐殿上者皆伏抑首尊卑以次起上壽壽觴九行

謁者言罷酒御史執法舉不如儀者輒引去羣臣莫不
振肅武帝雖用夏正然每月朔朝至於十月朔猶常享
會以高祖定秦之月元年歲首也其儀夜漏未盡七刻
鐘鳴受賀及贄公侯璧二千石羔千石六百石鴈四百
石以下雉百官賀正月

決疑要注云古者朝會皆執贄侯伯執珪子男執璧孤執皮帛

卿執羔大夫執鴈士執雉漢魏俱依其制正朝大會諸侯執玉璧薦以鹿皮公卿以下所執如古禮古者衣皮故用皮帛為幣玉以象德璧以稱事二千石以上上殿稱萬歲舉觴御坐

前司空奉羹大司農奉飯奏食舉樂百官受賜宴饗大

作樂

蔡質漢儀曰正月旦天子幸德陽殿臨軒公卿百官各陪位朝賀百蠻朝貢畢屬郡計吏皆覲庭燎

宗室諸劉雜會萬人以上立西面位既定上壽計吏中庭北面立太官賜酒食西入東出御史四人執法陛下虎賁羽林弧弓撮矢陛戟左右戎頭倡脛陪前向後左右中郎將位東南羽林虎賁將位東北五官將位中央悉坐就賜作九賓徹樂舍利獸從西方來戲於庭極乃畢入殿前激水化成比目魚跳躍嗽水作霧障日畢化為黃龍長八丈出水遨遊炫耀日光又以絲繩孫兩柱間相去數丈兩倡女對舞行於繩上相逢切肩不傾又踟局出身藏形斗中鐘磬倡樂畢作魚龍曼延小黃門鼓吹三通謁者引公卿以次拜徹行出卑官在前尊官在後其德陽殿周旋容萬餘人陛高一丈文石作壇畫屋朱梁玉陛金柱刻鏤

魏文帝受禪後

修洛陽宮室權都許昌宮殿狹小元日於城南立氈殿

青帷以為門設樂饗會後還洛陽依漢舊事其藩王不得朝覲明帝時有朝者皆由特恩不得為常晉氏受命武帝更定元會儀咸寧注云先正旦一日有司各宿設夜漏未盡十刻羣臣集庭燎起火上賀謁報又賀皇后還從雲龍東中華門入詣東閣下便坐漏未盡七刻百官及受贊郎官已下至計吏皆入立其次其陞衛者如臨軒儀漏未盡五刻謁者僕射大鴻臚各奏羣臣就位定漏盡侍中奏外辦皇帝出鐘鼓作百官皆拜伏太常

導皇帝升御座鐘鼓止百官起大鴻臚跪奏請朝賀掌
禮郎贊皇帝延王登大鴻臚跪贊藩王臣某等奉白璧
各一再拜賀太常報王悉登謁者引上殿當御座皇帝
興王再拜皇帝坐復再拜跪置壁御座前復再拜成禮
訖謁者引下殿還故位掌禮郎贊皇帝延太尉等於是
公特進匈奴南單于金紫將軍當大鴻臚西中二千石
千石六百石當大行令西皆北面伏鴻臚跪贊太尉中
二千石等奉璧皮帛羔鴈雉再拜賀太常贊皇帝延公

等登掌禮郎引公至金紫將軍上殿皇帝興皆再拜皇
帝坐又再拜跪置壁皮帛御座前後再拜成禮訖謁者
引下殿還故位公置壁成禮時大行令並贊殿下中二
千石以下同成禮訖以贊授贊郎郎以壁帛付諸謁者
羔鴈雉付太官太樂令跪奏雅樂樂以次作乘黃令乃
出車皇帝罷入百官皆坐晝漏上水六刻諸蠻夷胡客
以次入皆再拜訖坐御入後三刻又出鐘鼓作謁者僕
射跪奏請羣臣上謁者引王公二千石上殿千石六百

石停本位謁者引王詣樽酌壽酒跪授侍中侍中跪置
御座前王還自酌置位前謁者跪奏藩王臣某等奉觴
再拜上千萬歲壽四廂樂作百官再拜已飲又再拜謁
者引王等還本位陞者傳就席羣臣皆跪諾侍中中書
令尚書令各於殿上上壽酒登歌樂升太官又行御酒
御酒升階太官令跪授侍郎侍郎跪進御座前乃行百
官酒太樂令跪奏登歌三終乃降太官令跪請具御飯
到階羣臣皆起太官令持羹跪授司徒持飯跪授大司

農尚食持案並授持節持節跪進御座前羣臣就席太
樂令跪奏食舉樂太官行百官飯按遍食畢太樂令跪
奏請進樂樂以次作鼓吹令又前跪奏請以次進衆妓
乃召諸郡計吏前受敕戒於階下宴樂畢謁者一人跪
奏請罷退鐘鼓作羣臣北面再拜出然則夜漏未盡七
刻謂之晨賀晝漏上十三刻更出百官奉壽酒謂之晝
會別置女樂三十人於黃帳外奏房中之歌江左多虞
不復晨賀夜漏未盡十刻開宣陽門至平旦開殿門晝

漏上水五刻皇帝乃出受賀皇太子出會者則在三恪
下王公上正旦元會設白虎樽於殿庭樽蓋上施白虎
若有能獻直言者則發此樽飲酒案禮白虎樽乃杜舉
之遺式也宋因晉制升皇太子在三恪上齊因之梁元
會之禮雖有更革亦損益晉制也皇帝服通天冠王公
上壽上食既畢之後二品以上尚書駙騎引計吏郡國
各一人皆跪受詔侍中讀五條詔計吏更應諾訖令陳
便宜者聽詣白虎樽皇太子朝則遠遊冠乘金輅鹵簿

以行與會則劔履升座天監六年詔曰頃代以來元日
朝畢次會羣臣則移就西壁下東向坐求之古義王者
譙萬國唯應南面何更居東面於是御座南向以西方
為上皇太子以下在北壁坐者悉西邊東向尚書令以
下在南方坐者悉東邊西向陳制先元會十日百官並
習儀注令僕以下悉公服監之設庭燎街闕城上殿前
皆嚴兵百官各設部伍而朝宮人皆於東堂隔綺疏而
觀宮門既無籍外人但絳衣者亦得入觀是日上事人

發白虎樽自餘亦多依梁禮云隋制正朝及冬至文物
充庭皇帝出西房即御座皇太子鹵簿至明陽門外入
賀復詣皇后殿拜賀訖還宮皇太子朝訖羣官客使入
就位再拜上公一人詣西階解劔升賀降階帶劔復位
而拜有司奉諸州表羣臣在位者又拜而出皇帝入東
房有司奏行事訖乃出西房坐定羣官入就位上壽訖
上下俱拜皇帝舉酒上下舞蹈三稱萬歲皇太子與會
則設座於御東南西向羣臣上壽畢入位解劔以升會

訖先興唐開元八年十一月中書門下奏曰伏以冬至
一陽始生萬物潛動所以自古聖帝明王皆此日朝萬
國觀雲物禮之大者莫逾是時其日亦祀圜丘皆令攝
官行事質明既畢日出視朝國家以來更無改易緣修
新格將畢其日祀圜丘還改用小冬日受朝伏請改正
從之因勅自今以後冬至日受朝永為常式至天寶三
載十一月五日甲子冬至勅伏以昊天上帝義在尊嚴
恭惟祀典每用冬至既於是日有事圜丘更受朝賀實

深兢惕自今以後冬至宜取以次日受朝仍永為常式
讀時令

後漢制太史每歲上其年歷先立春立夏大暑立秋立冬常讀五時令皇帝所服各隨五時之色帝升御座尚書令以下就席位尚書三公郎中以令置案上奉以先入就席伏讀訖賜酒一卮魏明帝景初元年通事奏曰前後但見讀四時令至於服黃之時獨闕太史令高堂隆以為黃屬土也土王四季各十八日土生於火故於

火用事之末服黃三季則不其令則隨四時不以五行為令也是以服黃無令

斯則魏代不讀大暑令也

東晉成帝咸和五

年有司奏讀秋令時侍中荀奕上議云武皇帝時光祿大夫華恒議以秋夏盛暑常闕不讀令在春冬則不廢也夫先王所以順時讀令者蓋後天而奉天時正時服尊嚴之所重今比熱炎赫服章多闕請如恒議詔可六年有司奏立夏日正服漸備祇迓天和宜讀夏令奏可宋文帝元嘉六年讀時令三公郎中每讀皇帝臨軒百

僚備位多震悚失常儀唯孝武帝時劉勰明帝時謝緯
善於其事人主公卿並屬目稱歎北齊制立春日皇帝
服通天冠青介幘青紗袍佩蒼玉青帶青袴青韞舄而
受朝於太極殿西廂東向尚書令等坐定三公郎中詣
席跪讀時令訖典御酌卮酒置郎中前郎中拜還席伏
飲禮成而出至立夏立秋則施御座於中楹南向立冬
如春東向各以其時之色服儀並如春禮唐貞觀十一
年復修四時讀令武太后聖歷元年臘月制每月一日

於明堂行告朔之禮開元十六年命太常少卿韋縉每
月進月令一篇是後孟月朔日御宣政殿側置一榻東
西置案令韋縉坐而讀之諸司長官亦升殿列坐聽焉
歲除罷之餘並具開元禮

冊拜諸王侯

後漢制拜諸王侯三公之儀百官會位定謁者引光祿
勳前謁者引當拜者前當座伏殿下光祿勳前一拜舉
手曰制詔其以某為某

按丁孚儀安帝策夏勤文曰維
元初六年三月甲子制詔以太

鴻臚勳為司徒曰朕承天序維稽古建爾于位為漢輔
往率舊職慎敷五教在寬允左右朕躬宣力四表保乂
皇家於戲秉國之鈞方祇厥序時亮
天工可不慎歟勳其戒之此其創也讀策書畢拜者稱

臣再拜尚書郎以璽印綬付侍御史侍御史前東面立
授璽印綬當受策者再拜頓首三贊謁者曰某王臣某
新封某公某初謝中謁者報謹謝贊者立曰皇帝為公
興皆冠謝起就位供賜禮畢罷壯齊策諸王以臨軒日
上水一刻吏部令史乘馬齊召版詣王第王乘高車鹵
簿至東掖門止乘軺車既入至席尚書讀策訖以授王

又授章綬事畢出乘軺車入鹵簿乘高車詣閭闔門伏
闕表謝報訖拜廟還第則鴻臚卿持節吏部尚書授冊
侍御史授節使者受而出乘軺持節詣王第入就西階
東面王入立於東階西面使者讀冊博士讀版王俛伏
興進受策章綬茅土俛伏三稽首還本位謝如上儀在
州鎮則使者授節冊乘軺車至州如王第諸王三公儀
同尚書令五等開國太妃公主恭拜冊軸一枚長二尺
以白練衣之用竹簡十二枚六枚與軸等六枚長尺二

寸文出集書書皆篆字哀冊贈冊亦同諸王五等開國
及鄉男恭拜以其封國所在取社壇方面土苞以白茅
內青廂中函方五寸以青塗飾封授之以為社隋臨軒
冊命三師諸王三公並陳車輅餘則不百司定列內史
令讀冊訖受冊者拜受出又引次受冊者如上儀若冊
開國郊社令奉茅土立於仗南西面每授冊訖授茅土
焉唐之制如開元禮

三老五更

有虞氏深衣而養老夏后氏燕衣而養老商人縞衣而
養老周人玄衣而養老天子父事三老兄事五更親袒
割牲執醬而饋執爵而醕三公設几九卿正履祝鯁在
前祝饁在後使者安車輶輪送迎至家天子獨拜于屏
其明日三老詣闕謝以其禮遇太尊故也後漢明帝以
李躬為三老桓榮為五更安帝以魯丕李充為三老靈
帝又以袁逢為三老賜以玉杖魏高貴鄉公即位幸太
學命王祥為三老鄭小同為五更祥南面几杖以師道

自居天子北面乞言祥陳明王聖帝君臣政化之要以訓之聞者莫不砥礪後魏孝文養老於明堂以尉元為

三老游明根為五更帝再拜三老肅拜五更

鄭衆云但倚下手今

時擯拜是也擯音於志反即今之揖也

給三老上公之祿五更元卿之祿

後周武帝保定三年詔以太傅燕國公謹

于謹

為三老賜

延年杖帝幸太學以食之三老入門皇帝迎拜門屏之間三老答拜有司設三老席於中楹南向太師晉國公護升階設几於席三老升席南面憑几而坐大司寇楚

國公寧升階正鳥皇帝升立於斧扆之前西面有司進饌皇帝跪授醬豆親自袒割三老食訖皇帝又親跪授爵以醕有司撤訖皇帝北面立訪道三老乃起立於席後皇帝曰猥當天下重任自惟不才不知政治之要公其誨之三老答曰木受繩則正后從諫則聖自古明王聖主皆虚心納諫以知得失天下用安惟陛下念之三老言畢皇帝再拜受之三老答拜禮成而出唐制仲秋吉辰皇帝親養三老五更於太學其儀具開元禮

臣謹按五更蔡邕云五更_{是也}更字或作更今人於嫂字之更亦或作更而為嬾其實一也

鄉飲酒

臣謹按鄉飲酒者王道之始也尚齒尊賢莫尚乎此自漢歷唐未嘗廢也惟宋家以淳化中講究未備遂爾因循近日緣明州舉行其事朝廷遂下明州會例而頒之天下未幾而廢以明州之士不識禮意不可以行也何哉鄉飲禮者惟儀禮詳明所以唐太宗但

錄其一卷而頒之明州之行不知本儀禮但取禮記鄉飲義不本全經何以行事臣為是作鄉飲禮三種書蓋本儀禮於古而參開元禮於今復取於歷代而損益之今此篇但記前代所行云

後漢永平二年郡縣行鄉飲酒于學校祀先聖先師周公孔子牲以犬晉武帝泰始六年十二月帝臨辟雍行鄉飲酒之禮詔曰禮儀之廢久矣乃令復講肄舊典賜太常絹百疋丞博士及學生牛酒咸寧三年及惠帝元

康九年復行其禮唐貞觀六年詔曰比年豐稔閭里無事乃有墮業之人不顧家產朋遊無度酣宴是耽危身敗德咸由於此自非澄源正本何以革茲弊俗可先錄鄉飲酒禮一卷頒示天下每年令州縣長官親率長幼依禮行之庶乎時識廉恥人知禮節開元十八年宣州刺史裴耀卿上疏曰州牧縣宰所主者宣揚禮樂典校經籍所教者返古還淳上奉君親下安鄉族外州遠郡俗習未知徒聞禮樂之名不知禮樂之實竊見以鄉飲

酒禮頒於天下比來唯貢舉之日畧用其儀閭里之間
未通其事臣在州之日率當州所管一一與父老百姓
勸導行禮奏樂歌至白華華黍南陔由庚等章言孝子
養親及物遂性之義或有泣者則人心有感不可盡誣
但以州縣久絕雅聲不識古樂伏計太常具有樂器太
常久備和聲請令天下三五大州簡有性識人於太
常調習雅聲仍付笙竽琴瑟之類各三兩事令比州轉
次造習每年各備禮儀准令式行稍加勸獎以示風俗

其儀具開元禮

賓禮

三恪二王後

虞舜以堯子丹朱為賓曰虞賓而不臣之夏禹封丹朱於唐舜子商均於虞皆有疆土以奉先祀服其車服用其禮樂加之以客禮不臣也周武王克商而封夏後於杞殷後於宋皆公爵封舜後於陳侯爵以備三恪

周得天下

封夏商二王後又封舜後謂之恪恪恭也義取王之所恭禮

司几筵延國賓于牖前

左彤几王者立三恪二王之後者欲通師法之義以其
前代之後使之郊天以天子禮祭其始祖受命之王自
行正朔服色以此得通三正也魏文帝封後漢帝協為
山陽縣公邑萬戶位在諸王侯上奏事不稱臣受詔不
拜以天子車服郊祀天地宗廟臘如漢制都山陽濁鹿
城青龍二年薨諡曰孝獻皇帝以漢天子禮儀葬于禪
陵晉武帝泰始元年十二月遣太僕劉原告太廟封魏
帝奐為陳留王詔曰明德昭融遠鑒天命欽象歷數用

禪厥位敢咨詢故訓恭授青土于東國永為晉賓載天子旌旗乘五時副車行魏正朔郊祀天地禮樂制度皆如魏舊以承王顯祖之禋祀又詔王上書不稱臣答報不為詔一如賓禮二年詔陳留王操尚謙冲每事輒表非所以優崇之也主者諭意非大事皆使王官表上之三年博士祭酒劉喜等議漢魏為二王後衛公署於前代為二王後於大晉在三恪之數應降稱侯祭祀制度宜與五等公侯同有司奏陳留王山陽公為二代之後

衛公備三恪之禮易稱有不速之客三人來此則以三為斷不及五代也東晉明帝太寧二年詔曰三恪二王世之所重興滅繼絕政之所先禋祀不傳甚用傷悼主者詳議立後以聞時曹勣為嗣陳留王以主魏祀升平元年陳留王勣表稱廢疾積年不可以奉祭祀求放罷大學博士曹耽議勣為祭主而無執祭之期宜與穆子孟繫事同太常王彪之云二王之後不宜輕廢立記傳未見有已為君而以疾罷者孟繫穆子是方應為君非

陳留之比孝武帝太元十二年博士庾弘之等議陳留王前代之後遇以上賓之禮皇太子雖國之儲副在人臣之位今班次宜在王下宋武帝永初元年封晉恭帝為零陵王居于秣陵行晉正朔車旗服色一如其舊有其文而不備其禮文帝元嘉五年散騎常侍荀伯子上疏曰伏見百官位次陳留王在零陵王上按春秋次序諸侯宋居杞陳之上臣以零陵王位宜在陳留王上陳留王宜降爵為公十一年升在三恪隋封後周靜帝為

介國公唐武德元年五月詔曰革命創制禮樂變於三
正脩廢繼絕德澤崇於二代其以莒之鄆邑奉隋帝為
鄆公行隋正朔車旗服色一依舊章

軍禮

天子諸侯將出征類宜造禡並祭所過山川

周制天子將出征類于上帝宜于社造于禡肆師為帝

位帝位五德之帝所祭於南郊者類宜造皆祭名禡於所征之地禡師祭也受命於

祖以遷廟主載于齋車以行無遷主以幣帛皮珪告于

祖禰遂奉以出載于齋車以行每舍奠焉而後就舍

以脯

醢禮神乃

受成於學過大山川則用事焉

令祝用祭事告之凡出必

敢即安也

用牲幣反

出征執有罪反釋奠于學以訊馘告諸侯將

亦如之

出征宜社造禰及無遷主以主命並如天子之制梁天

監初陸璣定軍禮依古制類造等用牲幣帝曰宜者請

征討之宜造者稟謀於廟類者奉天時以明伐並明不

敢自專陳幣承命可也璣不能對嚴植之又爭之於是

告用牲幣反亦如之北齊天子親征慕容則服通天冠

文物充庭有司奏更衣乃入冠武弁左貂附蟬以出誓
訖擇日備法駕乘木輅以造于廟載遷廟主於齋車以
俟行次宜于社有司以毛血饗軍鼓載帝社祔主於車
以俟行次擇日陳六軍備大駕類于上帝次擇日祈后
土神州嶽鎮海瀆川源等乃為坎盟督將列牲於坎南
北首有司於坎前讀盟文割牲耳承血皇帝受牲耳徧
授大將乃寘于坎又軟血軟徧又以寘坎禮畢埋牲及
盟書又卜日建牙旗於墀祭以太牢及所過名山大川

使有司致祭將屆戰所卜剛日備元牲列軍容設柴於辰地為壇而禡祭大司馬奠矢有司奠毛血樂奏大護之音禮畢徹牲柴燎戰前一日皇帝禱祖司空禱社戰勝則各報以太牢又用太牢賞用命于祖引功臣入旌門即神庭而授版焉又罰不用命于社即神庭行戮訖振旅而還格廟詣社訖擇日行飲至之禮文物充庭有司執簡紀年號月朔陳六師凱入格廟之事飲至策勲之美用述其功不替賞典焉隋制天子行幸有司祭所

過嶽瀆以太牢山川以少牢若親征及巡狩則類上帝
宜造社廟還禮亦如之唐制車駕行幸及親征有司類
宜造禡如開元禮

輶祭

周制天子將出師太馭掌馭王輅以祀及犯輶王自左
馭馭下祝登受轡犯輶遂驅之

行山曰輶犯之者封土為山象以菩芻棘栢為

神主既祭之以車轡之而去喻無險難也

後周迎太白出國門而輶祭隋制

皇帝行幸親巡狩則輶祭其禮有司於國門外委土為

山象設埋埴有司劄羊陳俎豆駕將至委奠幣薦脯加
羊饌埋於埴駕至太僕祭兩軹及軌乃飲授爵遂轆輶
上而行唐車駕親征如開元禮

田獵

周制天子諸侯無事則歲行蒐苗獮狩之禮漢晉以來
有閱兵之制而史闕田獵之儀宋元嘉二十五年二月
大蒐于宣武場其法置行軍殿於幕府山南岡并設王
公百官幕先獵一日遣馬騎布圍右領軍將軍督右左

領軍將軍督左大司馬董正諸軍獵日侍中三奏一奏
搥一鼓為一嚴三嚴訖引仗為小駕鹵簿皇帝乘馬戎
服從者悉絳衫幘黃麾警蹕鼓吹如常儀獵訖宴會享
勞比較多少戮一人以懲亂法會畢還宮梁陳因之北
齊春蒐禮有司規大防建獲旗以表獲車前一日命布
圍領軍將軍一人督左甄護軍將軍一人督右甄大司
馬一人居中節制諸軍天子陳小駕服通天冠乘木輅
詣行宮將親禽服戎服鈇戟者皆嚴武衛張甄圍旗鼓

相望銜枚而進甄常開一方以令三驅圍合吏奔騎令
曰鳥獸之肉不登於俎者不射皮革齒牙骨角毛羽不
登於器者不射甄合大司馬鳴鼓促圍衆軍鼓譟鳴角
至期處而止大司馬屯北旌門二甄帥屯左右旌門天
子乘馬從南旌門外親射禽謁者以獲車收禽載還陳
於獲旗之北王公以下以次射禽皆送旗下事畢大司
馬鳴鼓解圍復屯殿中郎中率其屬收禽以實獲車天
子還行宮命有司每禽擇取三十一曰乾豆二曰賓客

三曰充君之庖其餘即於園下量犒將士禮畢改服鉞者韜刃而還夏苗秋獮冬狩禮皆同後周仲春教振旅大司馬建大麾於萊田之所鄉稍之官以旗物鼓鐸鉦饒各帥其人而致誅其後至者建麾於後表之軍中集衆庶質明偃麾誅其不及者乃陳徒騎如戰之陣大司馬北面誓之軍中皆聽鼓角以為進止之節田之日於萊之北建旗為和門諸將帥徒騎序入其門有司居門以平其人既入而分其地險野則徒前而騎後易野則

騎前而徒後既陣皆坐乃設驅逆騎有司表襦於陣前以太牢祭黃帝於狩地為壇建二旗列五兵於坐側行三獻禮遂蒐田致禽以祭社仲夏教芟舍遂苗田仲秋練兵遂獮田仲冬大閱遂狩田其致禽禘祀享烝教習之儀並如古周法隋大業三年煬帝在榆林突厥啓民及西域東胡君長並來朝貢帝欲示以甲兵之盛乃命有司陳冬狩之禮詔虞部量拔延山南北周二百里並立表記唐高祖武德五年十二月幸涇陽之華池校獵

謂羣臣曰今日畋樂乎諫議大夫蘓世長進曰陛下遊
獵薄廢萬機不滿十旬未為大樂高祖色變既而笑曰
狂態發邪世長曰為臣私計即狂為陛下國計即忠貞
觀十六年十二月狩于驪山時陰寒晦冥圍兵斷絕上
乘高遙見之欲捨其罰恐虧軍令乃迴轡入谷以避之
永徽元年冬出獵在路遇雨因問諫議大夫谷那律曰
雨衣若為得不漏對曰能以瓦為之必不漏矣上大悅
因此不復出獵先天元年十一月獵於驪山之下開元

三年十月大蒐于岐州鳳泉場屬夜雪天寒其圍兵並放散各賜布一端綿一屯蒐狩之制具開元禮

講武

漢興設南北軍之備外命天下郡國選能引彊蹶張材力武猛者以為輕車騎士材官樓船常以立秋後郊禮畢斬牲於東門以薦陵廟肆孫吳兵法六十四陣每十月都課試金革騎士各有員數如有寇警平地用車騎山阻用材官水泉用樓船孝文納鼂錯之策以為軍之

勝負定於內有事則可以應於外頗祖周司馬法齊寓

政之制

管子寓軍令

徙人於邊以起軍伍元帝用貢禹議始

罷角觝戲後漢初立秋之日自郊禮畢始揚威武斬牲
於郊東門以薦陵廟其儀乘輿御戎輅白馬朱鬣躬執
弩射牲太宰令謁者各一人載以獲車馳駟送陵廟還
宮遣使者齋東帛以賜武官武官肄兵習戰陣之儀斬
牲之禮名曰驅劉兵官皆肄孫吳兵法六十四陣既還
公卿以下陣雒陽前街乘輿到公卿已下拜天子下車

公卿親識顏色然後還宮

古語曰在車下車則唯
此時施行漢代以為常

靈帝

中平五年以天下黃巾賊起大發四方兵講武耀兵於
平樂觀以小黃門蹇碩為上軍校尉凡八校尉皆統於
碩起大壇上十二重五采華蓋高十丈壇東北為小壇
復建九重華蓋高九丈列步騎兵士數萬人結營為陣
天子親出臨軍駐大華蓋下大將軍何進駐小華蓋下
禮畢帝躬擐甲介馬稱無上將軍行陣三匝還獻帝建
安二十一年有司奏古四時講武按漢西京永制三時

不講唯十月都試金革今兵戈未偃士衆素習可無四
時講武但以立秋擇吉日大朝車騎號曰閱兵上合禮
名下承漢制是冬閱兵魏王曹操親執金鼓以令進退
延康元年曹丕嗣魏王其年秋閱兵于郊公卿相儀王
御華蓋親執金鼓之節魏明帝太和二年十月閱兵於
東郊晉武帝泰始四年九月咸寧元年太康四年六年
冬皆自臨宣武大閱衆軍然不自令進退自惠帝以後
其禮遂廢東晉太興元年詔左右衛及諸營教習依大

習儀作鴈羽仗成帝咸平中詔內外諸軍戲兵於南郊

之場其地因名閱場

晉志作闕

自後藩鎮桓庾諸方伯往往

閱習然朝廷無事焉宋文帝依故事肄習衆軍兼用漢
魏之禮其後以時講武於講武堂後魏明元帝永興五
年以九月十月之交親行驅劉之禮文成帝和平三年
因歲除大儺遂耀兵示武更為制令步兵陳於南騎士
陳於北各擊鐘鼓以為節度其步兵所衣青赤黑黃別
為部隊楯稍矛戟相次周迴轉易以相赴就有飛龍騰

蛇之變為函箱魚鱗四門之陣凡十餘法跪起前却莫不應節陣畢南北二軍皆鳴鼓角衆盡大譟各令騎將六千人去來挑戰步兵更進退以相拒擊南敗北捷以為威觀自後以為常北齊常以季秋皇帝講武於都外有司先芟萊野為場作二軍進止之節輿駕停觀遂命將教衆為戰場之法凡為陣少者在前長者在後其還則長者在前少者在後長者持弓矢短者持旌旗勇者持鉦鼓刀楯為前行戰士持槩者次之弓箭為後行將

帥先教士目使習見旌旗指麾之蹤發起之意旗卧則跪次教士耳使習聽金鼓動止之節聲鼓則進鳴金則止次教士心使知刑罰之苦賞賜之利次教士手使習持五兵之便戰鬪之備次教士足使習跪起及行列嶮泥之塗前五日皆請兵嚴於場所依方色建旗為和門都墀之中及四角建五綵牙旗應講武者各集於其軍戒鼓一通軍士皆嚴備二通將士擐甲三通步軍各為直陣以相俟大將各處軍中立旗鼓下有司陳小駕鹵

簿皇帝武弁乘革輅大司馬介冑乘馬奉引入行殿百
司陪列位定二軍迭為客主先舉為客後舉為主從五
行相勝法為陣以應之唐顯慶二年十一月講武於渰
水之南行三驅之禮上設次於尚書臺以觀之

時許州
長史封

道弘奏言後漢南郡太守馬融講尚書
於此因以為名今請改為講武臺從之

五年三月八日

又講武於并州城北上御飛閣羣臣臨觀之左衛大將
軍張延師為左軍左右驍武等六衛左羽林騎士屬焉
左武侯大將軍梁建方為右軍左右威領武侯等六衛

右羽林騎士屬焉一鼓而誓衆再鼓而整列三鼓而交前左為曲直圓銳之陣右為方銳直圓之陣三挑而五變步退而騎進五合而各復位許敬宗奏曰延師整而堅建方敢而銳皆良將也上曰講閱者安不忘危之道也梁朝衣冠甚盛人物亦多侯景以數千人渡江一朝瓦解武不可贖人不可棄此之謂也武太后聖歷二年欲以季冬講武有司延入孟春時王方慶上疏曰孟春之月不可講兵者兵金也金性剋木春盛德在木孟春

行冬令則水潦為敗雪霜大摯首種不入請至明年孟冬教習以順天道從之開元元年十月十二日講武於驪山之下調兵二十萬戈鉞金甲照耀天地列大陣於長川坐作進退以金鼓之聲節之明皇親擐戎服持大鎗立於陣前兵部尚書郭元振以虧失軍容坐于纛下將斬之宰臣劉幽求張說跪于馬前諫曰元振翊戴上皇有大功於國雖違軍令不可加刑伏願寬宥乃捨之配流新州給事中知禮儀唐紹以草軍儀有失斬之薛

訥為左軍節度衆以元帥及禮官得罪諸節部頗亦失序唯訥及解琬軍不動上令輕騎召訥等至軍門不得入禮畢特加慰勞

命將出征

漢高帝初為漢王都漢中將還定三秦擇良日齋戒設壇場具禮拜韓信為大將軍部署諸將東出陳倉收秦地魏故事遣將出征符節郎授節鉞跪而推轂北齊命將出征則太卜詣廟灼龜授鼓旗於廟皇帝陳法駕服

袞冕至廟拜於太祖徧告訖降就中階引上將操鉞授
柯曰從上至天將軍制之又操斧授柯曰從下至泉將
軍制之將軍既授斧鉞對曰國不可從外理軍不可從
中制臣既受命有鼓旗斧鉞之威願假一言之命於臣
帝曰苟利社稷將軍裁之將軍就車載斧鉞而出皇帝
推轂度閭曰從此以外將軍制之後周制大將出征遣
太祝以羊一祭所過名山大川明帝武成元年吐谷渾
寇邊帝戎服乘馬遣大司馬賀蘭祥討之告於太祖之

廟司憲奉鉞進授大將大將拜受以授從者禮畢出受
甲兵隋制皇太子親戎及將軍出師則以狻猊一釁鼓
皆告社廟授斧鉞訖不得反宿於家開皇八年晉王廣
將伐陳內史令李德林攝太尉告于太廟禮畢又命有
司宜于社二十年太尉晉王廣又北伐突厥次河上馮
祭軒轅黃帝以太牢制幣陳甲兵行三獻之禮唐之制
如開元禮

宣露布

後魏每攻戰克捷欲天下聞知乃書帛建於漆竿上名為露布自此始也其後相因施行隋文帝開皇中詔太常卿牛弘撰宣露布禮及九年平陳元帥晉王以驛上露布兵部奏請依新禮集百官四方客使等並赴廣陽門外服朝衣各依其列內史令稱有詔在位者皆拜宣訖蹈舞者三又拜而罷唐每平蕩寇賊宣露布其日守宮量設羣臣次露布至兵部侍郎奉以奏聞仍集文武羣官客使於東朝堂中書令宣布具如開元禮

大射鄉射

周制天子之大射天官司裘供虎侯熊侯豹侯設其鵠
夏官射人以射法治射儀王以六耦射三侯三獲三容
樂以騶虞九節五正諸侯以四耦射二侯二獲二容樂
以貍首七節三正孤卿大夫以三耦射一侯一獲一容
樂以采蘋五節二正士以三耦射一侯一獲一容樂以
采芣五節二正若王大射則以貍步張三侯鄉射之禮
地官鄉大夫各掌其鄉之政正月之吉受法于司徒退

而以鄉射之禮五物詢其衆庶一曰和二曰容三曰主
皮四曰和容五曰興舞漢宣帝甘露三年三月黃門侍
郎臨失其姓奏經曰鄉射合樂大射不何也韋元成曰鄉

射所以合樂者鄉人本無樂故合樂歲時所以合和百
姓以同其意也至諸侯當有樂傳曰諸侯不釋懸明用
無時也故不云合樂晉咸康五年春征西庾亮行鄉射
之禮依古周制親執其事洋洋然有洙泗之風宋武帝
為宋公在彭城九月九日出項羽戲馬臺射其後相承

以為舊準北齊三月三日皇帝常服乘輿詣射所升堂

即座皇太子及羣官坐定登歌進酒行爵皇帝入便殿

更衣以出驛騶令進御馬有司進弓矢皇帝射訖還御

座射懸侯又畢羣官乃射五埒一品三十發一發調馬十發射下

十發射上三發射麋三

發射帖三發射獸頭

三品二十五發

一發調馬五發射下十發射上

三發射麋三發射

帖三發射獸頭

四品二十發

一發調馬六發射下八發射上二發射麋二發

射帖一發

射獸頭

五品十五發

一發調馬四發射下五發射上二發射麋二發射帖一發射獸

頭

侍官御仗以上十發

一發調馬四發射下五發射上

季秋大射皇帝

御七寶輦射七埒正三品已上第一埒一品五十發

發一

調馬十五發射下二十五發射上

二品三品四十五發

三發射廐三發射帖三發射獸頭

一發調馬十五發射下二十二發射

從三品四品第二

上二發射廐餘與三品以下同也

埒三品四十二發

一發調馬十二發射下二十二發射
上二發射廐二發射帖三發射獸頭

四品三十七發

一發調馬十一發射下十七發射上
一發射廐二發射帖三發射獸頭

五

品第三埒三十二發

一發調馬九發射下十七發射上
一發射廐二發射帖二發射獸頭

六品第四埒二十七發

一發調馬八發射下十六發
射上一發射廐一發射帖

七

品第五埒二十一發

一發調馬六發射下十二
發射上餘與六品同也

八品第

六埒十六發

一發調馬四發射下九發射上餘同七品

九品第七埒十發

一發

調馬三發射下四發射上餘與八品同也

大將

太尉公為之

射司馬各一人錄事

二人七埒各置埒將射正參軍各一人埒士四人威儀

一人乘白馬以導的別參軍一人懸侯下府參軍一人

又各置令史將士等員以司其事唐之制皇帝射于射

宮則張熊侯觀于射宮則張麋侯皆去殿九十步太樂

令設宮懸之樂鼓吹令設十二案於殿之庭若遊宴射

則不陳樂懸三月三日九月九日賜百僚射

自貞觀至麟德七年

行三月之射行九月之射其禮遂至景雲二年諫議大夫源乾曜上表請行射禮直至先天元年二年

開

元八年九月賜百官九日射給事中許景先駁奏曰近三九之辰頻賜宴射以著格令猶降綸言但古制雖在禮章多闕官員累倍帑藏未充水旱相仍繼之師旅既不以觀德又未足威邊耗國損民且為不急夫古天子以射選諸侯以射飾禮樂以射觀容志故有騶虞貍首之奏采蘋采芣之樂天子則以備官為節諸侯以時會為節卿大夫以循法為節士以不失職為節皆審志固

行德美事成陰陽克和暴亂不作故諸侯貢士亦試於射官容體有虧則黜其地是以諸侯君臣皆盡志於射射之禮也其大矣哉今則不然衆官既多鳴鏑亂下以苟獲為利以偶中為能素無五善之容頗失三侯之禮凡令一箭偶中是費一丁租調用之既無惻隱獲之固無慙色疏奏罷之至二十一年八月勅下大射展禮先王創儀雖沿革或殊而遵習無曠往有陳奏遂從廢寢永鑒大典無忘舊章將射侯以觀德豈愛羊而去禮緬

惟古訓罔不率由自我而闕何以示後其三元射禮即
宜依舊遵行以今年九月九日賜於安福樓下

自此以後其禮

又其射侯儀具開元禮

臣謹按貞觀元年太宗謂蕭瑀曰朕少好弓矢自謂
能盡其妙近得良弓十數以示弓工乃曰皆非良材
也朕問其故曰木心不正則脉理皆邪弓雖剛勁而
遣箭不直非良弓也朕始悟焉朕以弧矢定天下四
方用弓多矣而有天下之日淺得為治之意固未及

乎弓弓猶失之何況于治自是遂延耆老問以政術

合朔代鼓

夏書曰乃季秋月朔辰弗集于房瞽奏鼓嗇夫馳庶人走周制日有蝕之天子不舉樂素服置五麾陳五鼓五兵及救日之弓矢又以朱絲繫社而伐鼓責之漢制天子救日蝕素服避正殿陳五鼓五兵以朱絲繫社內外嚴警太史登靈臺候日月有變便伐鼓祝史陳辭以責之聞鼓音侍臣皆著赤幘帶劒入侍三臺令史以上皆

持劔立其戶前衛尉驅馳繞宮伺察守備日復常昏罷
後漢建安中將元會而太史上言正朝當日蝕朝臣議
應會不共咨尚書令荀彧時博平計吏劉邵在坐曰梓
慎禪竈古之良史猶占水火錯失天時禮諸侯旅見天
子入門不得終禮者四日蝕在一然則聖人垂制不為
變異預廢朝禮或災消異伏或推術謬誤也時尚書令
荀彧及衆人咸善而從之遂朝如舊日亦不蝕邵由此
著名晉武帝咸寧三年四年並以正朝合朔却元會東

晉元帝大興元年四月合朔有司奏議按春秋日有蝕之天子伐鼓于社攻諸陰也諸侯伐鼓於朝臣自攻也按尚書符若日有變便擊鼓於諸門有違舊典詔曰所陳有正義輒勅外改之至康帝建元元年太史上元日合朔後復疑應却會與不庾冰輔政寫劉邵議以示八座蔡謨著議非之曰邵論災消異伏又以竈慎猶有錯失太史上言亦不必審其理誠然也而云聖人垂制不為變異先廢朝禮此則謬矣災祥之發所以譴告人君

王者之所重誠故素服廢樂退避正寢百官降物用幣
伐鼓躬親救之夫警誡之事與其疑而廢之寧慎而行
之禮記云諸侯入門不得終禮者謂日官不先言諸侯
既入見蝕乃知耳非先聞當蝕而朝會不廢也邵引此
文失其義旨於是衆議從之穆帝永和中殷浩輔政又
欲從劉邵議不即會王彪之曰禮云諸侯旅見天子不
得終禮而廢者四自謂卒暴有之非謂先存其事而僥
倖史官推術錯謬故不豫廢朝禮又從彪之議宋因晉

制齊武帝永明元年十二月有司奏今月三日臘祠太社稷一日合朔日蝕既在致齋內未審於社祠無疑不尚書令王儉議禮記曾子問天子嘗禘郊社五祀之祭簠簋既陳唯大喪乃廢至於當祭之日火及日蝕則停尋伐鼓用牲由來尚矣而簠簋初陳問所不及據此而言致齋初日乃值薄蝕則不廢祭按漢初平中博士孫瑞議以日蝕廢冠而不廢郊朝議從之王者父天親地郊社不殊此則前准謂不宜廢詔可北齊制日蝕則太

極殿西廂東向東堂東廂西向各設御座羣官公服晝
漏上水一刻內外皆嚴三門者閉中門單門者掩之蝕
前三刻皇帝服通天冠即御座直衛如常不省事有變
聞鼓音則避正殿就東堂服白袷單衣侍臣皆赤幘帶
劔升殿侍諸司各於其所赤幘持劔出戶向日立有司
各率官屬並行宮內諸門掖門屯衛太社鄴令以官屬
圍社守四門以朱絲繩繞繫社壇三匝太祝令陳辭責
社太史令二人走馬露版上尚書門司疾上之又告清

都尹鳴鼓如嚴鼓法日光復乃止奏解嚴唐合朔伐鼓
具開元禮

祭馬祖

周制春祭馬祖夏祭先牧秋祭馬社冬祭馬步隋制常
以仲春用少牢祭馬祖於大澤諸合祭官皆於祭所致
齋一日積柴於燎壇禮畢就燎仲夏祭先牧仲秋祭馬
社仲冬祭馬步並於大澤皆以剛日牲用少牢如祭馬
祖埋而不燎唐馬祭因隋之制其儀如開元禮

時儺

周制夏官方相氏掌蒙熊皮黃金四目玄衣朱裳執戈揚盾帥百隸而時儺以索室毆疫月令季春命國儺九門磔攘以畢春氣仲秋天子乃儺以達秋氣季冬命有司大儺旁磔以送寒氣後漢季冬先臘一日大儺謂之

逐疫

漢舊儀曰顓帝有三子生而亡去為疫鬼一居江水為虎一居若水為罔兩蜮鬼一居人宮室區隅

濕度善驚人小兒月令章句曰日行北方之宿北方太陰恐為所抑故命有司作大儺所以扶陽抑陰也盧植禮記注云所以逐疫而迎新
其儀選中黃門子弟年十歲以上十二

以下百二十人為振子皆赤幘卓裳執大鼗

振音

方相

氏黃金四目蒙熊皮玄衣朱裳執戈揚盾十二獸有衣
毛角中黃門行之冗從僕射將之以逐惡鬼于禁中夜
漏上水朝臣會侍中尚書御史謁者虎賁羽林郎將執
事皆赤幘陞衛乘輿御前殿黃門令奏曰振子備請逐
疫於是中黃門倡振子和曰甲作食舄肺胃食虎雄伯
食魅騰簡食不祥攬諸食咎伯奇食夢彊梁祖明共食
磔死寄生委隨食觀錯斷食巨窮奇騰根共食蠱凡使

十二神追惡凶赫汝軀拉汝幹節解汝肉抽汝肺腸汝

不急去後者為糧

東京賦曰捐魑魅斷獨狂斬委蛇腦方良因耕父於清洛淵女魃於神黃

殘夔魑與罔象殪野仲而殲遊光注曰魑魅山澤之神獨狂惡鬼委蛇大如車轂方良草澤神耕父女魃皆旱鬼惡水故因溺於水中使不能為害夔魑與罔象木石之怪野仲遊光兄弟八人在人間作怪害也孔子曰木石之怪夔罔兩水之怪龍罔象劉昭曰木石山怪也夔一足越人謂山獮罔兩山精好學人怪而迷惑人龍神物也非所常見故曰怪罔象食人一名沐腥脾蒼曰獮狂無頭鬼因作方相與十二獸

舞謹呼周徧前後省三過持炬火送疫出端門

東京賦曰煌火

馳而星流逐赤疫於四裔注曰煌火光煌如星馳逐驚走赤疫鬼惡者也振子台三行從東序上西序下門

外騶騎傳炬出官司馬闕門門外五營騎士傳火棄雒

水中

東京賦注曰衛士千人在端門外五營千騎在衛士外為三部更送至雒水中凡三輩逐一鬼投雒

水中仍上天池絕其橋梁使不復渡還

百官官府各以木面獸能為儼人

師訖設桃梗鬱壘葦茭畢執事陞者罷

山海經曰東海中有度朔山上有大桃根蟠屈三千里其卑枝門曰東北鬼門萬鬼出入也上有二神人一曰神荼一曰鬱壘主閱領衆鬼之

惡害人也執以葦索而用食虎於是黃帝法而象之毆除畢因立桃梗於門戶上畫鬱壘持葦索以御凶鬼畫虎於門當今見葦戟桃杖以賜公卿將軍諸侯云是月也立土

牛六頭於國都郡縣城外丑地以送大寒

月令章句曰是月之會建

且且為牛寒將極是故出其物類
形象以示送遠之且以升陽也

北齊制季冬晦選樂

人子弟為偃子如漢法合二百四十人百二十人赤幘
皂衣執戣百二十人赤布袴褶執鞞角方相氏執戈揚
盾又作窮奇祖明等十二獸皆有毛角鼓吹令率之中
黃門行之冗從僕射將之以逐惡鬼于禁中其日戊夜
三唱開諸里門讎者各集被服器仗以待事戊夜四唱
開諸城門二衛皆嚴上水一刻皇帝常服即御座王公
執事官一品以下六品以上陪列觀讎者鼓譟入殿西

門徧於禁內分出二上閤作方相與十二獸舞戲喧呼
周徧前後鼓譟出殿南門分為六道出於郭外隋制季
春晦儺磔牲於宮門及城四門以禳陰氣秋分前一日
禳陽氣季冬旁磔大儺亦如之其牲每門各用羝羊及
雄雞一選偃子如北齊法令八隊二時儺則四隊問事
十二人赤幘禱衣執皮鞭工人二十人其一人方相氏
如周禮一人為唱師著皮衣執捧鼓角各十人有司預
備雄雞羝羊及酒於宮門為次未明呼鼓譟以入方相

氏執戈揚盾周呼鼓譟而出合趣明陽門分詣諸城門
將出諸祝師執事與鬯牲胄磔之於門酌酒禳祝舉牲
并酒埋之唐制季冬大儺及州縣儺禮並如開元禮

通志卷四十四

欽定四庫全書薈要卷八千九百四十四

史部

通志卷四十五

宋右迪功郎鄭樵漁仲撰

禮略第四

凶禮

大喪及山陵制

并為期以下親哭及不親事附

喪期

天子弔大

臣服

天子為大臣及諸親舉哀

諸侯及公卿

大夫為天子服

皇太后長公主及三夫人已下

為天子服杖 挽歌 秀孝為舉將服 郡縣吏

為守令服 師弟子相為服 朋友相為服

大喪及山陵制 并為期以下親哭及不親事附

周制始崩太僕戒鼓傳達于四方內宗掌序哭者外宗

叙外內朝暮哭者世婦掌比外內命婦之朝暮哭不敬

者而呵罰之小宗伯縣纁冠之式于路門之外太僕掌

縣喪首服之法于宮門 首服之法謂免髻笄
總廣狹長短之數 三日祝先

服五日官長服 官長大
夫士 七日國中男女服 庶人 三月天下

服

諸侯之大夫也

宮正掌授廬舍辨其親疎貴賤之居

廬倚廬也舍堊

室也親者貴者居倚廬疏者賤者居堊室

漢舊儀曰高帝崩三日小斂室中

牖下作栗木主長八寸前方後圓圍一尺置牖中望外

內張緇絮以韋外以皓本大如指長三尺四枚纏以皓

皮四方置牖中主居其中央七日大斂棺以黍飯羊舌

祭之牖中已葬收主為木函藏廟太室中西牆壁堊中

帝初登遐朝臣稱曰大行皇帝風俗通云俗說易稱四

海為家雖都二京巡有方嶽又曰行在所由以行為辭

天命有終往而不返故曰大行天子新崩梓宮在殯太子已即位存亡有別不可但稱皇帝未及定諡故曰大行皇帝宮車晏駕周康王一朝晏起詩人深刺如今崩殯則為晏駕其喪葬儀無聞文帝遺詔其令天下吏民令到出臨三日皆釋除無禁取婦嫁女祠祀飲酒食肉自當給喪事服臨者皆無踐絰帶無過三寸無布車及兵器無發民哭臨宮殿中霸陵山川因其故無有所改歸夫人以下至少使中尉亞夫為車騎將軍屬國悍為

將屯將軍郎中令張武為復土將軍

師古曰穿壙出土下棺也已而真土

為墳故云復土

發近縣卒萬六千人發內史卒萬三千人藏郭

穿復土屬將軍武

即張武

賜諸侯王以下至孝悌力田金

帛各有差每天子即位明年將作大匠營陵地用地七

頃方中用地一項深十三丈堂壇高三丈墳高十二丈

武帝墳高二十丈明中高一丈七尺四周二丈內梓棺

栢黃腸題湊以次百官藏畢其設四通羨門容大車六

馬皆藏之內方外陟車石外方立先閉劍戶戶設夜龍

莫耶劍伏弩設伏火已營陵餘地為西園后陵餘地為

婕妤以下次賜親屬功臣

題頭也湊以頭向內所以為固也

後漢制皇

帝不豫太醫令丞將醫入就進所宜藥嘗藥監近臣中
常侍小黃門皆先嘗藥過量十二公卿朝臣問起居無
間太尉告請南郊司徒司空告請宗廟告五嶽四瀆羣
祀並禱求福登遐皇后詔三公典喪事百官皆衣白單
衣白幘不冠閉城門宮門近臣中黃門持兵虎賁羽林
中署皆嚴宿衛宮府各警北軍五校繞宮屯兵黃門令

尚書御史謁者晝夜行陳三公啓手足色膚如禮皇后

皇太子皇子哭踊如禮沐浴如禮守宮令兼東園匠將

女執事黃繇緹繒金縷玉柙如故事

漢舊儀曰帝崩哈以珠纏以緹繒十

二重以玉為標如鎧狀連縫之以黃金為縷晉以下以

玉為札長一尺廣二寸半為柙下至足亦縫以黃金縷

請諸衣衾斂之凡乘輿衣服已御藏之崩皆以斂

飯哈珠玉如禮

天子飯以珠哈以玉盤冰

如禮

大盤廣八尺長一丈三尺深三尺漆赤中

百官哭臨殿下是日夜下竹

使符告郡國二千石諸侯王

應劭曰凡與郡國守相竹使符皆以竹箭五枚長五

寸鐫刻篆書第一至第五張晏曰符以代古之珪璋從簡易也

竹使符到皆伏哭盡哀

舊漢制發兵皆以銅虎符其餘
竹使而已符第合會為大信

小斂如禮東園匠考工

令奏東園秘器表裏洞赤虞文畫日月烏龜龍虎連壁
偃月牙檜梓宮如故事大斂于兩楹之間五官左右虎
賁羽林五將各將所部執虎賁戟屯殿端門陞左右廂
中黃門持兵陞殿上夜漏羣臣入晝漏上水大鴻臚設
九賓隨立殿下謁者引諸侯王立殿下西面北上宗室
諸侯四姓小侯在後西面北上治禮引三公就位殿下
北面特進次中二千石列侯次二千石六百石博士在

後羣臣陪位者皆重行西上位定大鴻臚言具謁者以
聞皇后東向貴人公主宗室婦女以次立後皇太子皇
子在東西向皇子少退在南北面皆伏哭大鴻臚傳哭
羣臣皆哭三公升自阼階安梓宮內珪璋諸物近臣佐
如故事嗣子哭踊如禮東園匠武士下釘衽截去牙

喪大

記曰君蓋用漆三衽
三束鄭注曰衽小臂

太常上太牢奠太官食監中黃門

尚食次奠執事者如禮太常大鴻臚傳哭如儀三公奏
尚書顧命太子即日即天子位于柩前請太子即皇帝

位皇后為皇太后奏可羣臣皆出吉服入會如儀太尉
升自阼階當樞御座北面稽首讀冊畢以傳國王璽綬
東面跪授皇太子即皇帝位中黃門掌兵以玉貝隋侯
珠斬蛇寶劔授太尉告令羣臣羣臣皆伏稱萬歲或大
赦天下遣使者詔開城門宮門罷屯衛兵羣臣百僚罷
入成喪服如禮三公太常如禮故事百官五日一會臨
故更二千石刺史在京都郡國上計掾史皆五日一會
天下吏民發喪臨三日先葬二日皆旦晡臨既葬釋服

無禁嫁娶祠祀佐史以下布衣冠幘經帶無過三寸臨
庭中武吏布幘大冠大司農出見錢穀給六丈布直以
葬喪期依前漢制部刺史二千石列侯在國者及關內
侯宗室長吏及因郵奉奏諸侯王遣大夫一人奉奏弔
臣請驛馬露布奏可以木為重高九尺廣容八歷裏以
輦席巾門喪帳皆以簾車皆去輔輻疏布惡輪走卒皆
布溝幘太僕四輪輶為賓車大練為屋幙中黃門虎賁
各二十人執紼司空擇土造穿太史卜日謁者二人中

謁者僕射中謁者副將作油緹帳以覆坑方石治廣腸
題湊便房如禮大駕太僕御方相氏黃金四目蒙熊皮
玄衣朱裳執戈揚盾立乘四馬先驅旂之制長三仞十
有二旂曳地畫日月升龍書旒曰天子之樞謁者二人
立乘六馬為次大駕甘泉鹵簿金根容車蘭臺法駕喪
服大行載飾如金根車皇帝從送如禮太常上啓奠夜
漏二十刻太尉冠長冠衣齋衣乘高車詣殿止車門外
使者到南向立太尉進伏拜受詔太尉詣南郊未盡九

刻大鴻臚設九賓隨立羣臣入位太尉行禮執事皆冠
長冠衣齋衣太祝令跪讀諡策太尉再拜稽首治禮告
事畢太尉奉諡策還詣殿端門太常上祖奠中黃門尚
衣奉衣登容根車東園武士載大行司徒却行道立車
前治禮引太尉入就位大行車西少南東面奉策太史
令奉哀策立後太常跪曰進皇帝進太尉讀諡策藏金
匱皇帝次科藏于廟太史奉哀策葦篋詣陵太尉旋復
公位再拜立哭太常跪曰哭大鴻臚傳哭十五舉音止

哭太常行遣奠皆如禮請哭上哭如儀晝漏上水請發

司徒河南尹先引車轉太常跪曰請拜送載車著白系

參繆

音糾

紼長三十丈大七寸為輓六行行五十人公卿

以下子弟凡三百人皆素幘委貌冠衣素裳校尉三人

皆赤幘不冠絳科單衣持幢幡候司馬丞為行首皆銜

枚羽林孤兒已渝擢歌者六十人為六列鐸司馬八人

執鐸先大鴻臚設九賓隨立陵南羨門道東北面諸侯

王公特進道西北面東上中二千石二千石列侯宜九

賓東北面西上皇帝白布幕素裏夾美道東西向如禮
容車幄坐美道西南向車當坐南向中黃門尚衣奉衣
就幄坐車少前太祝進醴獻如禮司徒跪曰大駕請舍
太史令自車南北面讀哀策掌故在後已哀哭太常跪
曰哭大鴻臚傳哭如儀司徒跪曰請就下位東園武士
奉下車司徒跪曰請就下房都導東園武士奉車入房
司徒太史令奉諡哀策東園武士執事下明器

明器神
明之也

孔子謂為明器知喪道
矣備物而不可用也

筭八盛容三升黍一稷一麥一

梁一稻一麻一菽一小豆一甕三容三升醢一醢一屑

一屑薑桂之屑

黍飴載以木桁

桁所以度庖筭甕也

覆以疏布無二

容三升醴一酒一載以木桁覆以功布瓦鐙一彤矢四

軒輶中亦短衛彤矢四骨短衛

既夕曰猴矢一乘骨鏃短衛鄭注云猴猶候也

候物而射之矢也四矢曰乘骨鏃短衛亦示不用生時猴矢金鏃凡為矢五分筈長而羽其一

彤弓八

庖八牢八豆八籩八形方酒壺八盤匱一具

鄭注既夕曰槃匱盥

也杖几各一蓋一鐘十六無虞罇四無虞磬十六無虞

壺一簫四笙一箎一祝一敔一瑟六琴一竽一筑一坎

侯一千戈各一竿一甲一胄一輓車九乘芻靈三十六

匹

鄭注禮祀曰芻靈束茆為人馬謂之芻靈神之類

瓦竈二瓦釜二瓦甑一瓦

鼎十二容五升匏勺一容一升瓦案九瓦大杯十六容

三升瓦小杯二十容二升瓦飯槃十瓦酒罇二容五升

匏勺二容一升祭服衣送皆畢東園匠曰可哭在房中

者皆哭太常大鴻臚請哭止如儀司徒曰百官事畢臣

請罷從入房者皆再拜出就位太常導皇帝就贈位司

徒跪曰請進贈侍中奉持鴻洞贈玉珪長尺四寸薦以

紫巾廣袤各三寸緹裏赤纁周緣贈幣元三纁二各長

尺二寸廣充幅皇帝進跪臨羨道房戶西向手下贈投

鴻洞中三東園匠奉封入藏房中太常跪曰皇帝敬再

拜請哭大鴻臚傳哭如儀太常跪曰贈事畢皇帝促就

位續漢書曰明帝崩司徒鮑昱典喪事葬日三公八安梓宮還至羨道半途上欲下昱前叩頭言禮天子鴻

洞以贈所以重郊廟也陛下奈何冒危險不以義割哀上即還容根車游載容衣司徒

至便殿並聲

苦耕切

騎皆從容車王帳下司徒跪曰請就

幄導登尚衣奉衣以次奉器衣物藏於便殿太祝進醴

獻凡下用漏十刻禮畢司空將校復土皇帝皇后以下
皆去簾服服大紅還宮反廬立主如禮桑木主尺二寸
不書諡虞禮畢祔於廟如禮先大駕日游冠衣于諸宮
諸殿羣臣皆吉服從會如儀皇帝近臣喪服如禮醴大
紅服小紅十一升都布練冠醴小紅服纖醴纖服留黃
冠常冠近臣及二千石以下皆服留黃冠百官衣皂每
變服從哭詣陵會如儀祭以特牲不進毛血首司徒光
祿勲備三爵如禮太皇太后皇太后崩司空以特牲告

諡于祖廟如儀長樂太僕少府太長秋

長樂宮太后所居在西京後漢

都洛陽無長樂宮或是當時便循舊名為太后耳

典喪事三公奉制度他皆如

禮儀合葬羨道開通皇帝謁便房太常導至羨道去杖

中常侍受至柩前謁伏哭止如儀辭太常導出中常侍

受杖升車還宮以下反虞立主如禮諸郊廟祭服皆下

便房五時朝服各一襲在陵寢其餘及宴服皆封以篋

笥藏宮殿後閣室永平七年陰太后崩晏駕詔曰柩將

發於殿羣臣百官陪位黃門鼓吹通鳴鐘鼓天子舉哀

女侍史官三百人皆著素參以白素引棺挽歌下殿就車黃門宦者引以出宮省太后魂車鑾輅青羽蓋駟馬龍旂九旒前有方相鳳凰車大將軍妻參乘太僕妻御悉導公卿百官如天子郊鹵簿儀後和熹鄧后葬按以為儀自此皆降損於前事也魏武帝以禮送終之制襲稱之數繁而無益俗又過之先自制送終衣服四篋題識其上春秋冬夏曰有不諱隨時以斂金珥珠玉銅鐵之物一不得送黃初三年文帝又作終制曰禮國君即

位為棊存不忘亡也壽陵因山為體無封樹無立寢殿
無造園邑此詔藏之宗廟明帝時毛皇后崩未葬詔宜
稱大行議者謂漢天子稱行在所言不常居崩曰大行
者不反之謂也未葬未有諡而言大行者為嫌與嗣天
子同號至於后崩未葬禮未立后宜無所嫌故漢氏諸
后不稱大行謂未葬宜直稱皇后詔曰稱大行者所以
別存亡之號故事已然今當稱大行晉尚書問今大行
崩含章殿安梓宮宜在何殿博士卞摧楊雍議曰臣子

尊其君父必居之以正今太極殿古之路寢梓宮宜在太極殿依周人殯于西階既殯之後別奠下室之饌朝夕轉易諸所應設祭朔望牲用宜所施行按禮具答擁雍議按禮天子日食少牢月朔太牢喪禮下室之饌如他日宜隨御膳朝夕所常用也朔望則奠用太牢備物又問按景帝故事施倚廬於九龍殿上東廂今御倚廬為當在太極殿不諸王廬復應何所擁琳議按尚書顧命成王崩康王居于翼室先儒云翼室於路寢今宜在

太極殿上諸王宜各於其所居為廬朝夕則就位哭臨
東晉成帝咸康七年皇后杜氏崩詔外官五日一入臨
內官朝一入而已過葬虞祭禮畢止有司奏大行皇后
陵所作凶門栢歷門號顯陽端門詔曰門如所處凶門
栢歷大為繁費停之按蔡謨說以二瓦器始死之祭繫
於木裏以葦席置庭中近南名為重今之凶門是其象
也禮既虞而作主今未葬未有主故以重當之禮稱為
主道此其義也范堅又曰凶門非禮禮有懸重形似凶

門後人出門外以表喪俗遂行之薄帳即古弔幕之類
也是時又詔曰重壤之下豈宜崇飾陵中唯絜掃而已
有司又奏依舊選公卿已下六品子弟六十人為挽郎
詔又停之宋崔元凱喪儀云銘旌今之旒也天子丈二
尺皆施跗樹於廣中遣車九乘謂結草為馬以泥為車
疎布輶四面有障置壙四角以載遣奠牢肉斬取骨脰
車各載一枚陳永定三年七月武帝崩尚書左丞庾特
云晉宋以來皇帝大行儀注未祖一日告南郊太廟奏

策奉謚梓宮將登輜輶侍中版奏已稱其謚皇帝遣奠
出於陛階下方以此時乃讀哀策而前代策文猶稱大
行皇帝請明加詳正國子博士知禮儀沈文珂等謂應
劭風俗通前帝謚未定臣子稱大行以別嗣主近檢梁
儀自梓宮將登輜輶版奏皆稱某謚皇帝登輜輶伏尋
今祖祭已奉策謚哀策既在廷遣祭不應猶稱大行且
哀策篆書藏於元宮請依梁儀以傳無窮詔可唐貞觀
九年高祖崩詔定山陵制度令依漢長陵故事務在崇

厚時限既促功役勞弊祕書監虞世南上封事曰臣聞古之聖帝明王所以薄葬者非不欲崇高光明珍寶異物以厚其親然審而言之高墳厚壠珍物必備此適所以為親之累也非曰孝也是以深思遠慮安於菲薄以為長久萬代之計劃其常情以定之耳昔漢成帝造延昌二陵制度甚厚功費甚多諫議大夫劉向上書曰孝文居霸陵悽愴悲懷顧謂羣臣曰嗟乎以北山石為槨用紵絮斮陳漆其間豈可動哉張釋之進曰使其中有

可欲雖錮南山猶有隙使其無可欲雖無石棺又何戚
焉夫死者無終極而國家有廢興釋之所言為無窮計
也孝文寤焉遂以薄葬又漢氏之法人君在位三分天
下貢賦以一分入山陵武帝歷年長久比葬陵中不得
容物霍光暗於大體奢侈過度其後至更始之敗赤眉
入長安破茂陵取物猶不能盡無故聚斂百姓為盜之
用甚無謂也魏文帝於首陽東為壽陵作終制可謂達
於事矣今為丘壠如此其內不藏珍寶亦無益也萬代

之後人但見高墳大冢豈謂無金玉也臣之愚計以為漢文霸陵既因山勢雖不起墳自然高敞今之所卜地勢即平不可不起宜依白虎通所陳周制為三仞之墳其方中制度事事減少且臣下除服用三十六日已依霸陵今為墳壠又以長陵為法非所依也伏願深覽古今為長久之慮書奏不報虞世南又上疏曰漢家即位之初便營陵墓近者十餘歲遠者五十年方始成就今以數月之間而造數十年事其於人力亦以勞矣漢家

大郡五十萬戶即目人衆未及往時而工役與之一等
此臣所致疑也又公卿上奏請遵遺詔務從節儉於是
山陵制度頗有減省

喪期

易云古者喪期無數

賈公彥曰此黃帝時也是其心喪終身也

虞書稱三載

四海遏密八音

按唐虞雖行心喪更三年為限三王乃制喪服

商高宗諒闇三

年不言檀弓云子張問曰書云高宗三年不言言乃謹

有諸仲尼曰胡為其不然也古者天子崩王世子聽於

冢宰周武王崩成王十三而嗣立周公居冢宰攝政明年六月既葬周公冠成王而朝于祖以見諸侯漢文帝遺制革三年之喪其令天下吏民令到出臨三日皆釋服殿中當臨者皆以旦夕各十五舉音禮畢而罷非旦夕臨時禁無得擅哭臨服大紅十五日小紅十四日纖七日釋服

此喪制者文帝自率已意創而為之非有取於周禮也

他不在令中者

皆以此令比類從事布告天下使明知朕意喪期之制自後遵之不改成帝時丞相翟方進母終既葬三十六

日除服視事自以為身備漢相不敢踰國典然而原涉

行父喪三年名彰天下河間惠王行母喪三年詔書褒

稱以為宗室儀表是則喪制三年能行者貴之矣及平

帝崩王莽欲眩惑天下示忠孝使吏六百石已上皆服

喪三年

莽母死但服天子弔諸侯之服一弔再會而已
今子新都侯宗服喪三年及元后崩莽返自服

三年顛倒
姦謬若此

後漢安帝初長吏多避事棄官乃令自非父

母服不得去職是後吏又守職居官不行三年喪服矣

建光元年尚書孟布奏宜復如建元永平故事絕刺史

二千石告寧及父母喪服又從之至桓帝永興二年復令刺史二千石行三年服永壽二年又使中常侍已下行三年服至延熹元年又皆絕之魏武帝遺令葬畢便除服文帝崩國內服三日

蜀劉備臣下發喪滿三日除服至葬復如禮此則魏蜀又

異於漢也吳孫權令諸有居任者遭三年之喪皆須交代犯者定大辟之科又使代未至不得告告者抵罪其後吳令孟仁聞喪輒去陸遜陳其素行得減死一等自此遂減晉武帝泰始元年詔諸

將吏二千石以下遭三年喪者聽歸終寧庶人復除徭

役二年帝遵漢魏改葬除服

按文帝以魏公咸熙二年八月辛卯崩九月癸酉葬

武帝以十二月丙寅
受魏禪改元泰始

猶深衣素冠服降席撤膳遂以此

禮終三年後居太后之喪亦如文帝之崩也東晉康帝
建元元年正月晦成恭杜皇后周忌有司奏至尊周年
應改服詔曰君親名教之重也權制出於近代耳於是
素服如舊興寧元年章皇太妃薨哀帝欲服重江彪啓
先王制禮應在總麻服詔降周彪又啓厭屈私情所以
上嚴祖考於是制總麻三月孝武寧康中崇德太后褚
氏崩后於帝為從嫂或疑其服博士徐藻議以禮其夫

屬父道者妻皆母道則夫屬君道妻亦后道矣服后宜以資母之義於是帝制周服安帝隆安四年太后李氏崩帝服齊縗三年百僚疑所制服尚書左僕射何澄等議太皇太后名位允正體同皇極理制備盡情禮合伸春秋之義母以子貴既稱夫人禮服宜從正故成風著夫人之號僖公服之三年子於父之所生體尊義重且禮祖不厭孫固宜遂服無屈而緣情立制嫌文不明則宜從重應同為祖母後齊縗周永安皇后無服但一舉

哀百官亦一周詔可於西堂設菰廬神武門施凶門栢
歷宋永初三年武帝崩蕭太后制三年之服文帝元嘉
十七年七月元皇后崩兼司徒給事中劉溫持節監喪
神武門設凶門栢歷至西土閣皇太子於東宮崇正殿
及永福省並設廬諸皇子未有府第者於西解設廬太
子心喪三年心喪有禫無禫禮無成文世或兩行皇太
子心喪畢詔使博議有司奏喪禮有禫以祥變有漸不
宜便除心喪已經十二月大祥十五月宣下以為永制

詔可後魏自道武及諸帝悉依漢魏既葬公除後周武帝母叱奴太后崩帝居倚廬朝夕供一溢米羣臣表請累旬乃止及葬帝袒跣陵所行三年之制五服內並依禮隋制皇帝本服大功以上親及外祖父母皇后父母諸官正一品喪帝不視事三日本服五服內親百官正二品已上喪並一舉哀太陽虧國忌日本服小功總麻親百官三品已上舉哀不視事一日皇太后皇后為本服五服內親一舉哀皇太子為本服五服內親及東宮

三師三少宮臣三品已上一舉哀唐元陵遺制其喪儀
及山陵制度務從儉約並不以金銀錦綵飾天下節度
觀察團練使刺史等並不須赴哀祀祭之禮亦從節儉
其天下人吏勅到後出臨三日皆釋服無禁婚娶祠祀
酒肉其宮殿中當臨者朝夕各十五舉音禮固從宜喪
不可以皇帝宜三日聽政十三日小祥二十五日大祥
二十七日而釋服皇帝本服周者凡三朝哭而止本服
大功者晡哭而止本服小功以下一舉哀而止

天子弔大臣服

周制司服職掌王之吉凶衣服王為三公六卿錫纁為諸侯緦纁為大夫士疑纁其首服皆弁經魏蔣濟奏會喪不宜去冠奏事者上言前會故鎮軍朱鑠喪自卿以下皆去冠以布巾帕額使者侍中散騎則不皆非舊法夫冠成德之表於服之尊唯君親之喪小斂之前與服罪之人去冠其餘禮儀雖齊纁之痛有變無廢今為弔去冠其違禮意下博士杜布議以為論語曰羔裘玄冠

不以弔故周人玄冠代以素弁漢去玄冠代以布巾亦王者相變之儀未必獨非也古禮野夫著巾古者軍禮韋弁冠今者赤幘此明轉相變易不可悉還及古今宜因漢氏故事又按漢儀注諸侯王薨天子遣使者往皆言使者素服又禮自天子下達于士臨殯斂之士去玄冠以素弁君子臨喪必有哀素之心是以去玄冠代之以素是以漢中興臨喪之事與禮合自是之後或言臨喪使者常吉服布巾以為使者亦宜去玄冠代以布巾

示不純吉服侍中散騎諸會喪亦宜去玄冠代以布巾

詔從布議

蜀謝慈喪服圖天子弔三公弁經錫線弔大夫士皆弁經疑線弔畿內諸侯弁經總線服

晉摯虞云凡使弔祭同姓者素冠幘白練深衣器用皆素異姓者服色器用皆不變唐之制如開元禮

天子為大臣及諸親舉哀

後漢明帝時東海恭王薨帝出幸津門亭發哀魏大司馬曹真薨王肅為舉哀表云在禮大臣之喪天子臨弔諸侯之薨又庭哭焉同姓之臣崇於異姓自秦逮漢多

闕不修暨光武頗尊其禮于時羣臣莫不競勸博士范
升上疏稱揚以為美可依舊禮臣位而哭之敦睦宗族
於是帝幸城東張帳而哭之及鍾太傅薨又臨弔焉晉
武帝咸寧二年詔諸王公大臣薨應三朝發哀者踰月
舉樂其一朝發哀者三日不舉樂按摯虞決疑注云國
家為同姓王公妃主發哀於東堂為異姓公侯都督發
哀於朝堂東晉元帝娥廣昌君喪未葬中丞熊遠表云
按禮君於卿大夫比葬不食肉比卒哭不舉樂惻隱之

心未忍行吉事故也被尚書符冬至二日小會臣以為
廣昌君喪未殯聖恩垂悼禮大夫死廢一時之祭祭猶
可廢而況餘事冬至唯可奉賀而已未便小會詔以遠
表示賀循循答云按古者君臣義重雖以至尊之義降
而無服三月之內猶錫縗以居不接吉事故春秋晉大
夫智悼子未葬平公作樂杜蕢譏之咸寧詔書宜為定
制唐之制如開元儀

諸侯及公卿大夫為天子服

周制喪服斬縗章諸侯為天子天子至尊也漢戴德喪服變除云臣為君笄纚不徒跣始死深衣素冠其餘與子為父同鄭玄變除云臣為君不笄纚不徒跣張祖高問士服天王云何要記唯道大夫服君及家臣服大夫耳不說士恐有脫誤鄭云士服君亦斬縗無明文而雜記云士居堊室此則士制周制士下吏服士恐亦應同謝沈答曰朝廷之士服天王斬縗禮之明文也邑宰外任之士居堊室周制要記非脫誤是簡略耳晉尚書問

天子崩于今臺書令史以上為皆服斬縗之服不博士
卞推應琳議禮命士以上皆服斬臺書令史列職天朝
皆應服斬又問天子崩今司州及河南郡吏出入尊從
應易服制不卞推答禮庶人在官者服齊縗三月又近
臣服斬導從出入皆應從服又問服隨君輕重今司隸
服斬下吏服齊為合禮意不推答凡臣從君皆降一等
今之牧守皆古諸侯以禮相況輕重宜矣又問禮義服
不從今司隸為君輕縗義服也下吏為從不每降一等

當為君喪其親者耳古今行事復云何推答禮庶人為國君齊今則不服然吏若都官從士有職司於喪庭者故宜依庶人在官義耳義服不從謂近臣服君斬服之纓依降一等者之差耳前稱導從指謂近臣魏晉故事云又問諸二千石長吏見在京城皆應制服不博士卞推楊雍應琳等上云禮臣為君斬纓自士以上見在官者皆應制服唐元陵遺詔天下人吏勅到後三日釋服伏以公卿百僚不同人吏準禮臣為君服斬纓三年按

高宗實錄昭陵臣下喪服皆準漢文帝故事二十六日
又按高宗崩服紀輕重亦依太宗故事中宗睿宗時臣
下喪制並所遵守據禮及故事今百官並合準遺詔二
十七日釋服其小祥內百官並無假日每日平明詣延
英門進名起居不入正衙至臨時赴西內哭訖各歸至
小祥日去首經著巾冠其日早集於西內哭望日及大
祥又赴西內哭大祥日除纓冠杖等服慘公服至山陵
時却服本纓服事畢除之

皇太后長公主及三夫人已下為天子服杖

魏晉故事問皇太后三夫人已下皆服斬諸長公主及諸居崇陽園循容服制之宜卞推等議按禮與諸侯為兄弟者服斬依禮則公主宜服斬而不杖禮君夫人為長子三年妾為君之嫡子與夫人同則崇陽園循容宜三年又問太后及公主應杖不卞推應琳議禮為夫杖自天子達皇太后應杖明矣婦為舅姑禮無杖文皇后不應杖也君之喪夫人世婦在次則杖即位則使人執

之如禮三夫人已下皆杖東晉太元二十一年孝武帝崩李太后制三年之服宋永初三年武帝崩蕭太后制三年之服至唐天寶七載五月宗正卿褒信王璆奏皇妹及女準禮出嫁後各降本親一等今並降為第二等臣以為執禮故親有虧常典伏請一切依服屬等第為定不在降服限乃請永為常式奉勅依

挽歌

魯哀公十一年吳子伐齊將戰齊將公孫夏命其徒歌

虞殯

孔穎達曰虞殯者謂啓殯將虞之歌也今人謂之挽歌

漢高帝時齊王田橫

自殺其故吏不敢哭泣但隨柩叙哀而後代相承以為

挽歌蓋因於古也晉成帝咸康七年有司聞奏依舊選

公卿以下六品子弟六十人為挽郎詔又停之摯虞云

漢魏故事大喪及大臣之喪執紼者挽歌新禮以為挽

歌出於漢武帝役人之勞歌聲哀切遂以為送終之禮

雖音曲悽愴非經典所制不宜以歌為名按挽歌傳稱

君子作歌惟以告哀以歌為名亦無所嫌宜定新禮如

舊宋文帝元嘉十七年元皇后崩詔停選挽郎唐元陵
之制屬三繆練紼於輜輶車為挽凡六紼各長三十丈
圍七寸執紼挽士虎賁千人皆白布袴褶白布介幘分
為兩番挽郎二百人皆服白布深衣白布介幘助之挽
兩邊各一紼挽歌二部各六十四人八人為列執翬品
官左右各六人皆服白布襦衣白布介幘左右司馬各
八人皆戴白布武弁服白襦布襦音屬
謂襦長無領緣並執鐸
代哭百五十人衣幘與挽歌同至時有司引列於輜輶

車之前後其百官制鴻臚寺司儀署令掌挽歌三品以上六行三十人六品以上四行十六人皆白練襦衣皆執繹帔

秀孝為舉將服

魏景元元年傅元舉將僕射陳公薨以諮時賢光祿鄭小同云宜準禮而以情義斷之服弔服加麻可也三月除之司徒鄭公云昔王司徒為諫議大夫遭舉將喪雖有不反服今不同古便制齊縗三月漢代名臣皆然宋

庾蔚之謂白衣舉秀孝既未為吏故不宜有舊君之服
尊卑不同則無正服弔服加麻可也今人為守相刺史
又無服但身蒙舉達恩深於常謂宜如鄭小同弔服加
麻為允今已違適為異與舊君不同議論不奔弔故郡
將喪

郡縣吏為守令服

魏令曰官長卒官者吏皆齊縗葬訖而除之

蜀譙周云大夫受畿

內采邑有家臣雖又別典鄉遂之事其下屬皆上相屬
其吏非臣也秦漢無服采邑之家臣郡縣吏權假斬縗

代至則除晉喪葬令曰長吏卒官吏皆齊縗以喪服理事若

代者至皆除之武昌太守徐彥與征西桓溫牋云蔡徐州薨主簿服斬王征北薨於京都王丞相時在喪庭徐州主簿以服事諮公公謂輕重可依蔡侯時北中郎劉公薨於淮陰州主簿相承持重至都太宰薨州主簿改服齊縗中興以來江南皆從之公卿以下至邑宰吏服其君齊縗吏服其君齊縗則無從服之文而由來多有從服者陶大司馬遭兄子喪府州主簿從服時卞光祿

經過自說為太傅主簿太傅喪母已不從服此是用晉
令也郗太宰遭姊喪吏服惟疑郗問譙秀言不應從服
諸主簿仍便從服既服君旁親則服君便應重矣及二
公之薨府州主簿服齊縗宋庾蔚之謂晉令云代至而
除施之州郡縣員吏宜用齊周之制禮代殊事異理有
大斷今州府之君既不久居其位暫來之吏不得以為
純臣則齊周之制不為輕也君齊矣豈有從乎母妻其
猶不從本無義於傍親卞光祿所行是也二公使吏從

服姪姊可謂踈罔其垂遠矣

師弟子相為服

魏王肅曰禮師弟子無服以弔服加麻臨之哭之於寢
凡弔服加麻者三月除之晉賀循謂如朋友之禮異者雖出行猶經

所以尊師也按禮記夫子之喪門人疑所服子貢曰昔
夫子喪顏回若喪子而無服請喪夫子若喪父而無服
於是門人廬於墓所心喪三年蓋師徒之恩重也無服
者謂無正喪之服也孔子之喪二三子皆經而出注曰

為師也然則凡弔服加麻者出則變服矣新禮弟子為師齊縗三月摯虞駁曰仲尼聖師止弔服加麻心喪三年淺教之師黜學之徒不可皆為之服或有廢興悔吝生焉宜定新禮無服如舊范甯問曰奔喪禮師哭於廟門外孔子曰師吾哭之寢何邪徐邈答曰蓋殷周禮異也宋庾蔚之謂今受業於先生者皆不執弟子之禮惟師氏之官王命所置故諸王之敬師國子生之服祭酒猶粗依古禮弔服加麻既葬除之但不心喪三年耳

朋友相為服

周制檀弓云曾子曰朋友之墓有宿草而不哭焉又曰朋友吾哭寢門之外漢戴德云以朋友有同道之恩加麻三月魏劉德議問曰小記云朋友虞祔而已此謂主幼而為虞祔也若都無主族神不歆非類當為虞祔不田瓊答曰虞安神也祔以死者祔於祖也既朋友恩舊歡愛固當安之祔之然後義備也但後日不當祭之耳又問朋友無所歸於我殯若此者當迎彼還已館皆當

停柩於何所答曰朋友無所歸故呼而殯之不謂已殯
迎之也於已館而殯之者殯之而已不於西階也晉曹
述初問有仁人義士矜幼攜養積年為之制服當無疑
邪徐邈答曰禮緣情耳同爨總又朋友麻



通志卷四十五



總校官庶吉士臣侍朝

校對官編修臣閔懋大

騰錄監生臣陸恩綬